

MESYUARAT KEDUA, PENGGAJAL KEEMPAT
PARLIMEN KEEMPAT BELAS
2021

HARI SELASA : 9 NOVEMBER 2021

KANDUNGAN

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO. 6, 12 HINGGA NO. 43)

**[SOALAN NO 6 DIJAWAB BERSEKALI DENGAN
SOALAN NO 20]**

NOTA: [RUJUK PENYATA RASMI HARIAN (HANSARD)]

SOALAN NO : 6 JAWAB BERSEKALI SOALAN NO : 20

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN HAJAH NATRAH BINTI ISMAIL
[SEKIJANG]**

TARIKH : 9 NOVEMBER 2021 (SELASA)

SOALAN NO. 06

Puan Hajah Natrah binti Ismail [Sekijang] minta MENTERI PEMBANGUNAN WANITA, KELUARGA DAN MASYARAKAT menyatakan rasionalnya pemegang kad OKU yang dikeluarkan oleh Jabatan Kebajikan Masyarakat perlu memperbaharui kad mereka setiap tahun bagi membolehkan mereka untuk mendapatkan bantuan secara bulanan.

PERTANYAAN : JAWAB LISAN

**DARIPADA : YB DR. LEE BOON CHYE
[GOPENG]**

TARIKH : 9 NOVEMBER 2021 (SELASA)

SOALAN NO. 20

Dr. Lee Boon Chye [Gopeng] minta MENTERI PEMBANGUNAN WANITA, KELUARGA DAN MASYARAKAT menyatakan bilangan permohonan pendaftaran sebagai OKU dan bilangan kelulusan setiap tahun mulai tahun 2018.

SOALAN NO : 6 JAWAB BERSEKALI SOALAN NO : 20

JAWAPAN

Tuan Yang di-Pertua,

Saya mohon izin untuk menjawab pertanyaan daripada **YB Sekijang** bersekali dengan pertanyaan **YB Gopeng** bertarikh hari ini, kerana pertanyaan-pertanyaan tersebut saling berkait dan merujuk kepada isu yang sama.

Tuan Yang di-Pertua,

Pendaftaran Orang Kurang Upaya (OKU) adalah tertakluk kepada **Akta OKU 2008 [Akta 685]** dan ia dilakukan secara sukarela atas dasar tanggungjawab sosial.

Berhubung pertanyaan daripada YB Sekijang, tiada keperluan untuk pemegang kad Orang Kurang Upaya (OKU) Jabatan Kebajikan Masyarakat (JKM) memperbaharui kad mereka setiap tahun bagi membolehkan mereka mendapatkan bantuan kewangan secara bulanan. Pembaharuan kad OKU hanya perlu dilakukan sekiranya terdapat **perubahan kategori atau sub-kategori OKU**. Pemegang kad juga **boleh membuat penukaran kad sekiranya ingin menukar alamat atau gambar terkini**.

Tuan Yang di-Pertua,

Untuk makluman YB Gopeng, mengikut statistik Sistem Maklumat Orang Kurang Upaya (SMOKU), **sehingga 30 September 2021, sejumlah 582,944 OKU** telah berdaftar dengan Jabatan Kebajikan Masyarakat (JKM).

Secara keseluruhannya, dari tahun 2018 hingga 13 Oktober 2021, sejumlah **163,647 permohonan pendaftaran OKU telah diterima dan 153,627 telah diluluskan permohonan**. Kerajaan telah menyediakan pelbagai bantuan dan kemudahan bagi OKU yang berdaftar dan menepati syarat-syarat bantuan dan perkhidmatan yang ditawarkan.

SOALAN NO : 6 JAWAB BERSEKALI SOALAN NO : 20

Sehingga Ogos 2021, seramai 92,265 OKU yang bekerja dengan pendapatan RM1,500 dan ke bawah telah menerima Elaun Pekerja OKU (EPOKU) sebanyak RM450.00 sebulan dengan jumlah keseluruhannya sebanyak RM329.6 juta.

Manakala seramai 83,929 OKU yang tidak bekerja telah menerima Bantuan OKU Tidak Berupaya Bekerja (BTB) sebanyak RM300.00 sebulan dengan jumlah keseluruhannya sebanyak RM202.5 juta.

Selain itu, seramai 25,835 penjaga OKU atau pesakit terlantar telah menerima Bantuan Penjagaan OKU/Pesakit Kronik Terlantar (BPT) sebanyak RM500.00 sebulan dengan jumlah keseluruhannya sebanyak RM106.8 juta.

Ini bermaksud seramai **202,029 OKU** iaitu **hampir 35% OKU yang berdaftar atau penjaganya telah menerima bantuan JKM berjumlah RM638.9 juta sehingga Ogos 2021.**

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 9 NOVEMBER 2021 (SELASA)

SOALAN

minta **MENTERI KOMUNIKASI DAN MULTIMEDIA** menyatakan tentang kelajuan mandatori selular yang akan ditetapkan kepada semua kawasan di bawah Pelan Jalinan Digital Negara (JENDELA).

JAWAPAN

Tuan Yang Dipertua,

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (SKMM) telah menghasilkan Pelan Jalinan Digital Negara (JENDELA), yang bertujuan untuk menangani isu akses kepada Internet berkualiti bagi perkhidmatan tetap dan mudah alih.

Standard Mandatori Kualiti Perkhidmatan (MSQoS) adalah salah satu instrumen kawal selia utama yang diwujudkan untuk melindungi pengguna di Malaysia dari segi kualiti perkhidmatan. SKMM memantau dan mengawal selia pelaksanaan kualiti perkhidmatan yang diberikan oleh semua penyedia perkhidmatan yang relevan dan tindakan penguatkuasaan akan diambil terhadap pelanggaran mana-mana standard yang ditetapkan. Pengukuran adalah berdasarkan kepada tiga Standard Mandatori yang telah dikeluarkan oleh SKMM seperti berikut:

- a) Standard Mandatori perkhidmatan selular awam;
- b) Standard Mandatori perkhidmatan akses jalur lebar tanpa wayar; dan
- c) Standard Mandatori perkhidmatan akses jalur lebar talian tetap

Mengikut standard mandatori kualiti perkhidmatan jalur lebar tanpa wayar yang telah ditetapkan, kelajuan muat turun minima setiap pengguna adalah 2.5Mbps. Parameter ini adalah merujuk kepada pengukuran jalur lebar yang dijalankan oleh pihak SKMM dan juga pihak pembekal pekhidmatan pada setiap tempat.

Walaupun bagaimanapun, melalui JENDELA, penambahbaikan infrastruktur digital yang dilaksanakan secara berfasa bukan sahaja akan meningkatkan mutu perkhidmatan, malah akan meningkatkan kualiti pengalaman (*Quality of Experience/QoE*) perkhidmatan 4G yang disediakan. Antara sasaran Fasa 1 yang bermula tahun 2020 lagi, sehingga tahun 2022 adalah juga untuk mempertingkatkan kelajuan jalur lebar mudah alih daripada 25Mbps kepada 35Mbps. Untuk makluman, purata kelajuan jalur lebar mudah alih terkini pada suku tahunan ketiga 2021 ini juga telah meningkat daripada 25 Mbps kepada 31.34 Mbps.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN CHE ALIAS BIN HAMID (KEMAMAN)

TARIKH : 9 NOVEMBER 2021 (SELASA)

SOALAN

TUAN CHE ALIAS BIN HAMID minta **MENTERI KANAN PENDIDIKAN** menyatakan perancangan Kementerian bagi memastikan Dasar Bahasa Kebangsaan diperkasakan secara menyeluruh dan bersepadu di sekolah-sekolah seluruh negara.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) berperanan penting dalam memastikan bahasa Melayu dimartabatkan sebagai bahasa kebangsaan, selaras dengan ketetapan Perlembagaan Persekutuan (Perkara 152). Dalam hal ini, Dasar Pendidikan Kebangsaan telah menetapkan bahasa Melayu sebagai bahasa pengantar dalam sistem pendidikan kebangsaan selaras dengan Akta Pendidikan 1996.

KPM telah membuat perancangan dan melaksanakan pelbagai aktiviti bagi memperkasakan bahasa Melayu secara menyeluruh dan bersepadu di semua sekolah seluruh negara. KPM telah menghasilkan Pelan Hala Tuju Pendidikan Bahasa Melayu 2016-2025. Matlamat utamanya adalah untuk meningkatkan kualiti bahasa Melayu di sekolah dalam pelbagai aspek

seperti dalam bidang kurikulum, kokurikulum, pentaksiran, penyelidikan, menambah khazanah ilmu, kompetensi guru dan jaringan dengan pihak luar.

Antara inisiatif dalam Pelan Hala Tuju Pendidikan Bahasa Melayu 2016-2025 ini ialah:

- i. membangunkan Kerangka Standard Bahasa Melayu;
- ii. menyediakan Program Interaktif Kemahiran Bahasa Melayu;
- iii. membangunkan Kerangka Holistik Pembangunan Profesionalisme Guru Bahasa Melayu;
- iv. menubuhkan Lembaga Pengiktirafan Pendidikan Bahasa Melayu;
- v. memperkasakan kemahiran lisan dalam pengajaran dan pembelajaran Bahasa Melayu di semua jenis Sekolah,
- vi. memperkasakan Ujian Lisan Bahasa Melayu sekolah rendah dan menengah;
- vii. membangunkan format baharu pentaksiran Bahasa Melayu dan Kesusasteraan Melayu Komunikatif Sijil Pelajaran Malaysia;
- viii. menjenamakan semula Kesusasteraan Melayu kepada Kesusasteraan Melayu Komunikatif di sekolah menengah;
- ix. menetapkan Ujian Penguasaan Bahasa Melayu sebagai syarat mengikuti program di universiti;
- x. memilih bakal guru Bahasa Melayu dengan memberi keutamaan kepada calon yang memiliki kepujian Kesusasteraan Melayu Komunikatif; dan
- xi. membudayakan bahasa Melayu sebagai bahasa ekonomi dan perniagaan.

KPM yakin usaha yang dilaksanakan ini dapat terus memartabatkan bahasa Melayu sebagai bahasa utama negara dalam memupuk rasa cinta dan bangga terhadap bahasa kebangsaan.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : DATUK DR. HASSAN BIN BAHROM
[TAMPIN]**

TARIKH : 9 NOVEMBER 2021 (SELASA)

SOALAN

DATUK DR. HASSAN BIN BAHROM [TAMPIN] minta **MENTERI PERTANIAN DAN INDUSTRI MAKANAN** menyatakan apakah Kementerian mempunyai data yang lengkap berkaitan dengan penglibatan golongan belia dengan pertanian, penternakan dan perikanan.

JAWAPAN

Tuan Yang Di Pertua,

Untuk makluman Ahli Yang Berhormat, buat masa ini MAFI mempunyai pangkalan data dalaman bagi penerima Geran Agropreneur Muda sejak tahun 2016 hingga kini. MAFI melalui Unit Agropreneur Muda sehingga kini menyimpan data meliputi 7,528 penerima Geran Agropreneur Muda yang telah menerima bantuan bernilai RM134.29 juta. Daripada jumlah tersebut, seramai 2,946 orang atau 39.1% terlibat dalam bidang tanaman dan 2,513 orang atau 33.4% terlibat dalam bidang industri makanan. Manakala, 1,457 orang atau 19.4% terlibat dalam bidang ternakan dan 612 orang atau 8.1% terlibat dalam bidang perikanan.

MAFI juga telah menerbitkan data ini melalui buku Inspirasi Agropreneur Muda yang memuatkan infografik data Geran Agropreneur Muda dan kisah-kisah kejayaan agropreneur muda sepanjang tahun 2016 hingga 2020 untuk dijadikan sumber rujukan rasmi kepada semua pihak termasuk para akademik, pertubuhan belia, agensi-agensi Kerajaan dan Bukan Kerajaan. Untuk makluman Ahli Yang Berhormat juga, buku ini boleh didapati secara atas talian melalui portal MAFI.

Bagi memperkukuhkan lagi data penerima Geran Agropreneur Muda, MAFI kini sedang membangunkan Sistem Geran Agropreneur Muda atau e-GAM yang dijangka siap pada bulan Februari 2022. Sistem ini bukan sahaja bertujuan untuk memudahkan golongan muda untuk memohon bantuan geran secara atas talian, malah membolehkan MAFI menjalankan pemantauan projek-projek agropreneur muda ini dengan lebih efisien.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 9 NOVEMBER 2021 (SELASA)

SOALAN

Minta **MENTERI PENGAJIAN TINGGI** menyatakan perancangan Kementerian dalam mempelbagaikan biasiswa (seperti Mybrain sebelum ini) atau pembiayaan untuk membantu pelajar-pelajar pascasiswazah membayar yuran pengajian mereka di Universiti Awam (UA) pada masa ini.

JAWAPAN

Tuan Yang di-Pertua,

Kerajaan amat komited dalam melahirkan modal insan yang berkemahiran tinggi untuk membangunkan negara, serta berkebolehan menjadi pemimpin yang dapat mencorakkan masa depan negara yang lebih cemerlang. Menyokong usaha ini, Kementerian Pengajian Tinggi (KPT) menyediakan pelbagai kemudahan pembiayaan dalam bentuk biasiswa dan bantuan kewangan pendidikan kepada pelajar yang mengikuti pengajian di Institusi Pengajian Tinggi (IPT). Ini bagi membantu meringankan beban kewangan pelajar-pelajar yang memerlukan pembiayaan pengajian di samping memberikan galakan kepada mereka untuk melanjutkan pelajaran ke peringkat yang lebih tinggi.

Antara program pembiayaan pendidikan di bawah KPT yang disediakan kepada pelajar pascasiswazah yang berkeelayakan ialah program:

- (i) MyBrainScience;
- (ii) Skim Latihan Akademik Bumiputera (SLAB);
- (iii) Skim Latihan Akademik IPTA;
- (iv) Hadiah Latihan Persekutuan (HLP) Pegawai Pendidikan Pengajian Tinggi;
- (v) Hadiah Latihan Persekutuan (HLP) Pegawai Bukan Akademik di Universiti Awam;
- (vi) Biasiswa Tokoh Siswa; dan
- (vii) Biasiswa Atlet Cemerlang IPT.

Tidak terhad kepada itu, pelajar pascasiswazah dalam kalangan OKU juga layak menerima Bantuan Kewangan Orang Kurang Upaya (BKOKU).

Melangkah ke hadapan, KPT merancang untuk mewujudkan program bantuan kewangan yang baharu dikenali sebagai KPT IHSAN. Inisiatif ini adalah antara langkah untuk menambah baik kemudahan pembiayaan sedia ada khususnya kepada kumpulan sasaran yang lebih besar. Skop bantuan yang disediakan melalui program ini termasuklah pembelian peranti, pembayaran yuran peperiksaan kemasukan ke universiti seperti IELTS, bantuan persediaan ke IPT, bayaran yuran tertunggak dan bantuan yuran penyelidikan. Berbanding kaedah penilaian pemberian pembiayaan pendidikan sedia ada yang memfokuskan kepada merit dan penilaian prestasi akademik, KPT IHSAN akan menumpukan kepada aspek keperluan pelajar (*need-based approach*) sebagai pemberat utama dalam menentukan penyaluran bantuan.

Suka juga saya kongsi di sini bahawa selain daripada KPT, pembiayaan pendidikan turut disediakan oleh institusi Kerajaan yang lain, Syarikat Berkaitan Kerajaan (GLC) dan Yayasan-yayasan Negeri. Antaranya ialah Jabatan Perkhidmatan Awam (JPA), MARA, PETRONAS, Yayasan Tenaga Nasional, Yayasan Telekom, Bank Negara Malaysia dan Khazanah Nasional. Malah, di peringkat universiti sendiri telah diwujudkan tabung endowmen pendidikan yang diuruskan oleh Pejabat Tabung Endowmen masing-masing. Melalui tabung ini, pelbagai kemudahan dan bantuan pendidikan boleh disalurkan kepada pelajar-pelajar universiti yang berkecukupan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN BARU BIAN [SELANGAU]

TARIKH : 9 NOVEMBER 2021 (SELASA)

SOALAN

minta **MENTERI KOMUNIKASI DAN MULTIMEDIA** menyatakan Belanjawan 2021 memperuntukkan bantuan kewangan kepada Perusahaan Kecil dan Sederhana (PKS) untuk menerima pakai teknologi digital. Berapa bilangan penyedia teknologi digital yang merupakan syarikat milik rakyat Malaysia.

JAWAPAN:

Tuan Yang Dipertua,

Untuk makluman Ahli Yang Berhormat, Kementerian Komunikasi dan Multimedia Malaysia (KKMM) melalui agensinya iaitu Malaysia Digital Economy Corporation (MDEC) telah melaksanakan beberapa program bagi menggalakkan Perusahaan Kecil dan Sederhana (PKS) untuk mengguna pakai teknologi digital. Antara program utama yang dilaksanakan MDEC yang melibatkan bantuan kewangan kepada syarikat adalah Geran Automasi Pintar atau *Smart Automation Grant* (SAG). SAG merupakan bantuan kewangan dalam bentuk geran padanan sebanyak lima puluh peratus (50%) daripada jumlah keseluruhan kos projek atau sehingga had maksimum RM200,000.00 (yang mana lebih rendah) bagi syarikat-syarikat perkhidmatan kecil sederhana (PKS) mengautomasikan proses dan operasi perniagaan mereka dengan penggunaan teknologi digital. Inisiatif ini bertujuan untuk menggalakkan syarikat tempatan PKS memanfaatkan teknologi digital bagi meningkatkan produktiviti serta mengurangkan kos operasi dan kebergantungan kepada proses manual.

Mekanisma pelaksanaan Geran ini melibatkan kerjasama institusi kewangan, rakan industri, agensi kerajaan dan pakar industri. Sejak SAG dilancarkan pada bulan Julai 2020, inisiatif ini mendapat sambutan yang sangat memberangsangkan.

Sebanyak 698 permohonan telah diterima dan daripada jumlah ini, 82 syarikat PKS telah diberikan kelulusan. Pemohon Geran ini boleh melantik mana-mana syarikat penyedia penyelesaian teknologi terutamanya syarikat tempatan yang memenuhi kriteria yang ditetapkan untuk pelaksanaan projek. Walau bagaimanapun, pemohon boleh melantik syarikat dari luar negara dengan kriteria setanding sekiranya penyelesaian digital yang diperlukan tidak dapat disediakan oleh syarikat tempatan. Sehingga kini, permohonan yang lulus telah bekerja sama dengan 79 syarikat penyedia penyelesaian teknologi tempatan dan 3 syarikat asing.

Selain daripada Geran Automasi Pintar atau SAG ini, Kerajaan juga menyediakan bantuan kewangan kepada PKS dan Koperasi melalui Geran Digitalisasi PKS atau *SME Business Digitalisation Grant (SBDG)*. Geran ini membantu PKS dan Koperasi untuk menerapkan teknologi digital dalam operasi perniagaan mereka. Kementerian Kewangan (MOF) telah melantik Bank Simpanan Nasional (BSN) sebagai peneraju utama dalam menyalurkan geran tersebut termasuk permohonan, pemprosesan dan pembayaran geran. MDEC merupakan rakan strategik kepada BSN di peringkat awal sahaja iaitu dalam memberikan khidmat nasihat bidang pendigitalan serta menyediakan senarai syarikat Pembekal Perkhidmatan atau *Technology Solutions Provider (TSP)* yang terpilih dan dipersetujui oleh BSN. Sehingga Oktober 2021, sejumlah 539 syarikat tempatan milik rakyat Malaysia telah disenaraikan sebagai penyedia penyelesaian digital untuk membantu PKS dan Koperasi mendigitalkan operasi perniagaan mereka.

MDEC juga melaksanakan program-program untuk menggalakkan penggunaan platform e-dagang yang disasarkan kepada Perusahaan Mikro, Kecil dan Sederhana (PMKS). Di bawah Inisiatif e-dagang Belanjawan 2021, dua (2) kempen kini sedang dilaksanakan iaitu, kempen Go-eCommerce Onboarding dan kempen Shop Malaysia Online

yang disertai oleh penyedia teknologi digital – platform e-dagang. Inisiatif ini telah bermula pada 1 Julai 2021 dan akan berakhir pada 31 Disember 2021. Antara 28 platform e-dagang di bawah kempen Go-eCommerce Onboarding, sebanyak 18 platform e-dagang ini dimiliki oleh rakyat Malaysia. Pada masa yang sama, bagi kempen Shop Malaysia Online, sebanyak 11 daripada 18 platform e-dagang adalah milik rakyat Malaysia. Antara platform e-dagang milik rakyat Malaysia ialah Beep, Boost, Deliverat, Dhause, Dropee, iBeli, InstanteStore, JDMas, Jocom, Kravve, Kumoten, Lokein, Maybank Sama Sama Lokal, MPay, PGMall, Revenue Monster, Senangpay, Sitegiant, Subplace dan Wonderfly.

Secara puratanya, penglibatan penyedia teknologi digital yang dimiliki oleh rakyat Malaysia adalah sebanyak 63% di bawah inisiatif ini. Setakat 31 Ogos 2021, kempen ini telah berjaya menjana jualan e-dagang melebihi RM2 bilion, dan telah memberi manfaat kepada lebih 300,000 peniaga tempatan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN SABRI BIN AZIT (JERAJ)

TARIKH : 9 NOVEMBER 2021 (SELASA)

SOALAN

TUAN SABRI BIN AZIT minta **MENTERI KANAN PENDIDIKAN** menyatakan status terkini dan jumlah peruntukan yang disalurkan untuk memperbaiki infrastruktur sekolah-sekolah yang rosak akibat bencana kepala air di Daerah Yan Kedah baru-baru ini.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk menyediakan infrastruktur pendidikan yang selamat dan kondusif untuk kegunaan murid dan warga sekolah.

Bencana kepala air yang berlaku di Daerah Yan, Kedah telah mengakibatkan kerosakan kepada empat (4) buah sekolah iaitu SK Haji Nyak Gam, SK Langkasuka, SJKC York Khoon dan SMK Yan. Kerosakan yang berlaku adalah seperti kerosakan pada pagar, padang, laluan masuk ke sekolah dan pendawaian eletrik. Selain itu, perabot, peralatan sekolah dan peralatan bengkel turut rosak teruk akibat bencana ini.

Untuk makluman Ahli Yang Berhormat, KPM telah memperuntukan sebanyak RM2.44 juta untuk kerja-kerja penyelenggaraan bagi membaiki kerosakan infrastruktur di 4 buah sekolah tersebut. Selain itu, KPM juga telah memperuntukan sebanyak RM600,000.00 bagi tujuan penggantian aset khususnya perabot dan peralatan sekolah. Peruntukan tersebut telah disalurkan kepada Jabatan Pendidikan Negeri Kedah pada 8 September 2021.

Pada masa ini, kerja-kerja penyelenggaraan kecil seperti pembaikan pagar dan cat sedang dijalankan. Semua kerja ini akan dapat disiapkan selewat-lewatnya pada penghujung bulan November 2021. Manakala, kerja-kerja penyelenggaraan besar yang melibatkan struktur bangunan seperti bumbung, pendawaian eletrik, padang dan jalan masuk dijangka siap selewat-lewatnya pada bulan Februari 2022. Bagi tujuan penggantian perabot dan peralatan sekolah, perolehan sedang dijalankan dan dijangka selesai pada penghujung bulan November 2021. Sekolah akan menerima penggantian tersebut secara berperingkat selewat-lewatnya pada 30 November 2021.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : DATUK MOHD AZIS BIN JAMMAN
[SEPANGGAR]
TARIKH : 09 NOVEMBER 2021 (SELASA)

SOALAN

DATUK MOHD AZIS BIN JAMMAN [SEPANGGAR] minta **MENTERI KEWANGAN** menyatakan bagi memastikan penyampaian dan pelaksanaan yang lebih pantas, adakah Kerajaan bercadang untuk menyalurkan peruntukan secara terus kepada Kerajaan Sabah bagi menambah baik kemudahan asas jalan raya, bekalan air dan elektrik.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan Persekutuan amat menitikberatkan pembangunan dan kesejahteraan rakyat di kesemua negeri, termasuk di Sabah.

Sabah merupakan antara negeri yang menerima peruntukan terbesar di bawah Perbelanjaan Pembangunan, atau dengan izin *DE* yang disediakan oleh Kerajaan Persekutuan bagi Belanjawan 2021, dan juga Bajet 2022.

Sebagai contoh, dari segi **peruntukan DE yang diterapkan di dalam Bajet 2022, sebanyak 5.16 bilion ringgit diperuntukkan untuk Sabah**, iaitu peningkatan sebanyak 104 juta ringgit berbanding tahun 2021. Jumlah peruntukan ini merangkumi **lebih dari 10 peratus daripada jumlah peruntukan DE untuk kesemua negeri**, dan melibatkan 1,048 projek.

Peruntukan pembangunan bagi Negeri Sabah sentiasa meningkat dari tahun ke tahun membuktikan bahawa Kerajaan sentiasa mengambil perhatian untuk menambah baik infrastruktur, kemudahan asas jalan raya, bekalan air dan elektrik. Antara projek pembangunan yang sedang dilaksanakan adalah Lebuhraya Pan Borneo Sabah, Projek Bekalan Air Luar Bandar Negeri Sabah dan Projek Bekalan Elektrik Luar Bandar Sistem Solar Hibrid.

Selain daripada peruntukan pembangunan ini, Kerajaan Persekutuan juga menyediakan geran tahunan khas kepada Sabah. Ini bagi memastikan pembangunan di Negeri Sabah dapat dilaksanakan dengan lebih pantas bagi merapatkan jurang pembangunannya dengan negeri-negeri lain.

Bagi negeri Sabah, Kerajaan juga telah menyediakan peruntukan berikut:

- a. Peruntukan dari segi pemberian/pembayaran Kerajaan Persekutuan kepada Kerajaan Negeri Sabah. Untuk tahun 2021 ianya berjumlah RM1.13 bilion, atau hampir 15 peratus dari jumlah pemberian/pembayaran untuk kesemua Kerajaan Negeri. Malah, ini diunjurkan akan meningkat dalam tahun 2022.
- b. Untuk tahun 2021, bantuan tunai bernilai RM1.31 bilion telah memanfaatkan 864 ribu warga negeri Sabah, hampir 10 peratus daripada jumlah pemberian bantuan tunai.

Selain itu, rakyat Sabah juga telah memanfaatkan pelbagai bantuan-bantuan lain seperti bantuan tunai, program subsidi upah, serta pelbagai program pekerjaan seperti pencarian pekerjaan, latihan dan peningkatan kemahiran, yang juga akan diteruskan di bawah Bajet 2022.

Pada masa ini, Kerajaan Persekutuan masih mengekalkan kaedah penyaluran melalui kementerian yang terlibat bagi memastikan pelaksanaan projek pembangunan tersebut selaras dengan agenda pembangunan nasional dan dipantau rapi supaya menepati sasaran pembangunan yang dirancang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 9 NOVEMBER 2021 (SELASA)

SOALAN

Minta **MENTERI PENGAJIAN TINGGI** menyatakan apakah langkah yang diambil bagi membantu pelajar terutama Bumiputera memilih bidang pengajian yang bersesuaian selari dengan IR 4.0.

JAWAPAN

Tuan Yang di-Pertua,

Proses kemasukan pelajar lepasan Sijil Pelajaran Malaysia (SPM) dan Sijil Tinggi Pelajaran Malaysia (STPM) atau yang setaraf ke pengajian peringkat Sijil, Asasi, Diploma dan Ijazah Sarjana Muda ke Universiti Awam (UA), Politeknik, Kolej Komuniti dan Institusi Latihan Kemahiran Awam (ILKA) adalah berasaskan prinsip meritokrasi. Ini dilaksanakan tanpa mengira agama, bangsa, negeri, keturunan dan latar belakang yang mana proses pemilihan adalah berasaskan 90 peratus pencapaian akademik dan 10 peratus kokurikulum.

Dalam konteks membantu para pelajar terutamanya Bumiputera untuk memilih bidang pengajian yang bersesuaian dan selari dengan IR 4.0, Kementerian Pengajian Tinggi telah melaksanakan beberapa program. Satu daripadanya ialah acara tahunan – Program Jom Masuk IPT. Program ini diadakan dengan semangat untuk memperluas akses dan ekuiti ke pendidikan tinggi. Ia juga sejajar dengan aspirasi pendidikan global yang disasarkan oleh Kementerian melalui Pelan Pembangunan Pendidikan Malaysia – Pendidikan Tinggi (2015 – 2025), di bawah Lonjakan 10: Transformasi Penyampaian Pendidikan Tinggi.

Pada tahun ini, Program Jom Masuk IPT dianjurkan secara virtual seiring dengan norma baharu. Usaha ini dilaksanakan bagi memastikan mereka yang ingin memohon melanjutkan pelajaran ke IPT, mendapat maklumat yang tepat dan terkini mengenai peluang pendidikan tinggi yang ditawarkan di dalam negara. Dalam hubungan ini juga, Kementerian melalui Bahagian Kemasukan Pelajar IPTA membantu ibu-bapa dan pelajar membuat pemilihan bidang pengajian yang bersesuaian dengan memberikan penekanan agar membaca Syarat Am dan Syarat Khas program pengajian yang ditawarkan dalam e-panduan sebelum mengemukakan permohonan di UPUOnline.

Melalui paparan *dashboard* UPUOnline, pemohon juga boleh merujuk maklumat tambahan berkenaan dengan kebolehpasaran graduan di IPT mengikut tahun berserta dengan statistik permohonan dan

tawaran UPU dalam tempoh lima tahun ke belakang. Ini bagi membantu para pemohon membuat keputusan pilihan program pengajian. Tidak terhad kepada itu, keputusan pentaksiran psikometrik yang diambil sewaktu di sekolah juga boleh dilihat dalam pautan pada *dashboard* UPUOnline untuk mengetahui kecenderungan mereka sebelum memilih kursus yang bersesuaian.

Untuk makluman ahli Yang Berhormat juga, terdapat peningkatan enrolmen pelajar Bumiputera Sabah dan Bumiputera Sarawak pada tahun 2020 iaitu seramai 44,218 orang berbanding 42,023 orang pada tahun 2019. Peningkatan ini merujuk kepada semua kategori bidang di UA, iaitu bagi Program Asas; Pendidikan; Sastera dan Kemanusiaan; Sains Sosial, Perniagaan dan Perundangan; Sains, Matematik dan Komputer; Kejuruteraan, Pembuatan dan Pembinaan; Pertanian dan Veterinar; Kesihatan dan Kebajikan; dan Perkhidmatan. Secara keseluruhan, Bidang Sains Sosial, Perniagaan dan Perundangan menunjukkan peningkatan tertinggi sebanyak 7.45 peratus, iaitu 186,473 pelajar pada tahun 2020 berbanding tahun 2018 seramai 173,538 pelajar. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADIN
(KINABATANGAN)**

TARIKH : 9 NOVEMBER 2021 (SELASA)

SOALAN

DATO' SRI BUNG MOKTAR BIN RADIN minta **MENTERI KANAN
PENDIDIKAN** menyatakan:-

- (a) apakah usaha Kementerian dalam memastikan kualiti pembelajaran murid-murid sekolah dapat dikekalkan dan tidak terjejas berikutan penutupan sekolah. Apakah alternatif lain selain dari Pengajaran dan Pembelajaran Di Rumah (PdPR) memandangkan terdapatnya kekangan kepada keluarga yang tidak berkemampuan untuk mengikuti pembelajaran secara "on-line" ataupun keluarga yang tinggal di kawasan yang tidak mempunyai rangkaian internet yang stabil; dan
- (b) sejauh manakah murid-murid sekolah boleh memahami dan mengikuti skop PdPR dan apakah prestasi pembelajaran murid-murid dapat dikekalkan seperti pembelajaran secara bersemuka dengan kehadiran di sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid. PdPR boleh dilaksanakan melalui tiga pendekatan iaitu secara dalam talian (online), luar talian (off-line) dan off-site mengikut kesesuaian guru dan murid.

Bagi menilai tahap keberkesanan PdP semasa tempoh penutupan sekolah, KPM telah melaksanakan Kajian Keberkesanan Pelaksanaan *Home-based Learning* yang ditadbir secara dalam talian. Kajian ini memfokuskan kepada PdPR semasa Perintah Kawalan Pergerakan (PKP). Skop kajian meliputi aspek pelaksanaan PdPR dalam tempoh Mac hingga Julai tahun 2020 yang merangkumi pendekatan, kaedah, strategi, aplikasi dan peralatan yang digunakan dalam pelaksanaan PdPR. Selain itu, kajian tersebut juga melihat kepada penjadualan PdPR, penyusunan semula Rancangan Pelajaran Tahunan (RPT) dan pentaksiran. Kajian ini melibatkan 13,156 orang pentadbir sekolah, 39,967 orang guru, 52,413 orang murid dan 59,624 orang ibu bapa/penjaga. Dapatan kajian menunjukkan pelibatan murid di bandar dalam PdPR secara dalam talian adalah sebanyak 59.3 peratus berbanding 51.4 peratus bagi murid di luar bandar. Bagi RPT pula, 46.2 peratus guru di bandar mencapai sasaran pelaksanaan berbanding dengan 39.1 peratus guru di luar bandar.

Dapatan kajian ini juga menunjukkan tahap keberkesanan PdPR adalah pada tahap sederhana. Sebanyak 34.1 peratus murid menyatakan hasil pembelajaran di rumah adalah tidak seperti yang diperolehi di sekolah dan merupakan punca pembelajaran kurang berkesan.

Selain itu, 51.2 peratus murid berasa tertekan semasa pembelajaran di rumah. Daripada kumpulan tersebut, 48.9 peratus murid menyatakan sebab tertekan adalah kerana interaksi yang terhad dengan guru, manakala 55.0 peratus murid tertekan disebabkan interaksi terhad dengan rakan-rakan. Sebanyak 53.4 peratus murid pula tertekan disebabkan kurang bimbingan dalam sesi pembelajaran.

Dapatan kajian juga menunjukkan terdapat murid menganggap PdPR merupakan suatu pengalaman baharu. Sebanyak 56.6 peratus murid berjaya melibatkan diri secara aktif semasa sesi pembelajaran di rumah dan 49.7 peratus murid berasa seronok semasa mengikuti PdPR. Sebanyak 57.5 peratus murid berjaya menyiapkan tugas atau latihan yang diberikan oleh guru dalam masa yang ditetapkan. Dapatan kajian juga menunjukkan sebanyak 36.0 peratus murid boleh belajar sendiri menggunakan bahan pembelajaran di rumah dalam tempoh PKP.

Selain daripada pelaksanaan kajian tersebut, pada suku tahun pertama 2021, KPM telah menjalankan Tinjauan Pelaksanaan PdPR yang melibatkan 500 buah sekolah melalui pemerhatian terhadap PdPR yang dilaksanakan dalam talian atau gabungan dalam dan luar talian. Pemerhatian dilaksanakan melalui kehadiran Nazir Sekolah dalam kelas PdPR secara dalam talian. Pemerhatian ini dimaklumkan lebih awal kepada guru yang terlibat.

Sebanyak 1,053 pemerhatian dilaksanakan ke atas PdP guru. Tinjauan mendapati 98.7 peratus guru dapat mengelola isi pelajaran yang diajar mengikut peruntukan masa yang ditetapkan. Sebanyak 97.4 peratus guru berjaya membimbing murid untuk memahami dan menguasai isi, konsep dan fakta berkaitan pelajaran. Sementara itu, 96.7 peratus guru berjaya menarik perhatian murid untuk memberi respons terhadap pembelajaran dan memastikan keterlibatan murid semasa PdPR secara *real-time*.

Hasil tinjauan juga mendapati murid memberi respons positif terhadap tugas yang diberikan oleh guru dalam 97.5 peratus PdPR yang

diperhatikan. Murid juga dapat melengkap dan menghantar tugas dengan pelbagai cara antaranya, melalui rakaman video, slaid pembentangan dan *voice call*.

Rumusan daripada tinjauan ini menunjukkan bahawa guru berupaya merangsang murid berfikir dan berkomunikasi dalam PdPR. Guru juga dapat melaksanakan aktiviti pembelajaran yang menyeronokkan dan menarik minat murid untuk belajar.

Untuk makluman Ahli Yang Berhormat, dalam memastikan semua murid mengikuti PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Data pelaporan bermula 20 Januari hingga 30 September 2021 menunjukkan peratus murid yang mengikuti PdPR meningkat. Pelibatan murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.5 peratus iaitu daripada 78.0 peratus kepada 97.5 peratus.

Secara kesimpulannya, dapatan kajian menunjukkan pelaksanaan PdPR berhadapan dengan pelbagai cabaran dan kekangan pada peringkat awal. Namun, intervensi yang dilaksanakan oleh KPM telah membantu murid mengikuti PdPR dengan lebih baik. KPM sentiasa komited untuk memastikan murid dapat meneruskan pembelajaran dalam keadaan yang selamat dan mendapat akses kepada pembelajaran yang berkualiti pada setiap masa.

Bagi membantu murid yang tidak mempunyai akses internet atau peranti yang sesuai, guru mengambil inisiatif untuk melaksanakan PdP secara luar talian melalui penggunaan buku teks. Buku aktiviti pula boleh digunakan untuk membuat latihan ulangkaji. Guru menyediakan modul

pembelajaran dan membuat serahan bahan tersebut kepada murid. Guru juga mentaksir murid secara berterusan mengikut kesesuaian dan melaksanakan intervensi mengikut tahap dan keupayaan murid.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

KPM juga telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM akan terus memastikan pembelajaran murid diberi perhatian dan hak mereka untuk belajar sentiasa diberi keutamaan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN CHOW KON YEOW (TANJONG)

TARIKH : 9 NOVEMBER 2021 (SELASA)

SOALAN

TUAN CHOW KON YEOW (TANJONG) minta **MENTERI PENGANGKUTAN** menyatakan rasional cadangan Lapangan Terbang Antarabangsa Kulim (KXP) yang mana terletak begitu hampir dengan Sungai Muda. Perincikan jaminan serta tindakan bagi mengelakkan sebarang kemalangan/kecelakaan/masalah pelepasan air sisa projek KXP ke Sungai Muda serta projek 'aerotropolis' yang mana titik terdekat projek terletak hanya 6 kilometer dari muka sauik Lahar Tiang Perbadanan Bekalan Air Pulau Pinang (PBAPP) di Seberang Perai.

JAWAPAN

Tuan Yang di Pertua,

Mesyuarat Majlis Perancang Fizikal Negara (MPFN) dalam mesyuaratnya pada 27 Oktober 2020 hanya memberi kelulusan prinsip terhadap cadangan Projek Pembangunan Lapangan Terbang Antarabangsa Kulim (KXP). Kelulusan prinsip ini adalah tertakluk kepada permohonan mendapatkan pertimbangan daripada Kementerian Pengangkutan (MOT) dan beberapa agensi Kerajaan yang lain seperti Kementerian Kewangan (MOF), Kementerian Dalam Negeri (KDN), Jabatan Alam Sekitar (JAS), Tentera Udara Diraja Malaysia (TUDM), Pihak Berkuasa Penerbangan Awam Malaysia (CAAM) dan beberapa agensi Kerajaan yang lain.

Kementerian Pengangkutan ingin menjelaskan bahawa sehingga kini, tiada kelulusan diberikan untuk menubuhkan aerodrom bagi Projek KXP seperti mana yang diperuntukkan di bawah Peraturan-Peraturan Penerbangan Awam (Pengendalian Aerodrom) 2016.

Selain itu, cadangan pembinaan KXP juga adalah tertakluk kepada Kajian Pelan Strategik Lapangan Terbang Negara (NASP) yang akan dimulakan pada akhir tahun 2021 bagi semua 42 lapangan terbang sedia ada termasuk cadangan pembinaan lapangan terbang baharu. Maka, penggerak projek KXP (Kerajaan Negeri Kedah) kelak akan diminta untuk memberi maklumat kepada pasukan perunding NASP berhubung unjuran-unjuran yang realistik dan tepat khususnya unjuran permintaan perkhidmatan penumpang dan kargo serta komitmen syarikat penerbangan yang ingin menggunakan KXP, lebih-lebih lagi dalam era pasca COVID-19, bagi menilai *viability* projek pembinaan KXP.

Oleh itu, kelulusan akhir bagi cadangan pembinaan KXP hanya akan dipertimbangkan apabila kajian NASP telah disiapkan serta pematuhan kepada semua syarat yang ditetapkan oleh agensi-agensi kerajaan yang lain sepertimana yang dinyatakan dalam laporan-laporan teknikal seperti Laporan Penilaian Impak Alam Sekeliling (EIA), Laporan Penilaian Impak Sosial (SIA), Laporan Penilaian Impak Trafik (TIA) dan sebagainya.

Ini bagi memastikan cadangan pembinaan lapangan terbang benar-benar *viable*, *sustainable* dan memenuhi keperluan teknikal yang ditetapkan oleh CAAM dan MAVCOM.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : TUAN SIVAKUMAR VARATHARAJU NAIDU
(BATU GAJAH)
TARIKH : 9 NOVEMBER 2021 (SELASA)

SOALAN

TUAN SIVAKUMAR VARATHARAJU NAIDU minta **MENTERI KANAN PENDIDIKAN** menyatakan rancangan Kementerian untuk melokasikan semula sekolah-sekolah kurang murid (SKM) ke tempat yang lebih strategik berdasarkan Pelan Pembangunan Pendidikan Malaysia 2013-2025. Data Kementerian Pendidikan Malaysia menunjukkan lebih 70% Sekolah Jenis Kebangsaan Tamil (SJKT) berada dalam kategori SKM.

JAWAPAN

Tuan Yang di-Pertua,

Kementerian Pendidikan Malaysia (KPM) telah merangka beberapa strategi di bawah inisiatif Pelaksanaan Pelan Hala Tuju Sekolah Kurang Murid (SKM). Strategi tersebut adalah;

- i. pelaksanaan kelas bercantum dengan pengajaran pelbagai gred;
- ii. penggabungan SKM;
- iii. pemindahan atau penempatan semula SKM; atau
- iv. pengekalan SKM atas keperluan.

Untuk makluman Ahli Yang Berhormat, semenjak tahun 2011 sehingga 2021 terdapat 24 permohonan pindah lokasi melibatkan SJKT berstatus SKM yang telah diluluskan oleh KPM. Bagi sekolah bantuan kerajaan (SBK) yang berstatus SKM, pihak Lembaga Pengelola Sekolah (LPS) perlu membiaya sepenuhnya kos pemilikan tapak dan kos pembinaan bangunan sekolah di lokasi baharu tersebut sebelum mendapat kelulusan KPM.

KPM akan terus meneliti pendekatan terbaik bagi memastikan kapasiti sekolah dan sumber pendidikan di seluruh negara dapat dioptimumkan.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN YUSUF BIN ABD. WAHAB
[TANJONG MANIS]**

TARIKH : 9 NOVEMBER 2021 (SELASA)

SOALAN

Tuan Yusuf bin Abd. Wahab [Tanjong Manis] minta **MENTERI PELANCONGAN, SENI DAN BUDAYA** menyatakan apakah inisiatif untuk menggalakkan pelancongan di kawasan Tanjong Manis. Untuk makluman, di kawasan Tanjong Manis, terdapat produk pelancongan seperti monyet belanda, ikan lumba-lumba, buaya, burung hijrah, industri songket dan lain-lain yang boleh menarik pelancong ke sini.

JAWAPAN

Tuan Yang di-Pertua,

1. Kementerian Pelancongan, Seni dan Budaya Malaysia mengambil maklum akan potensi kawasan Tanjong Manis sebagai salah satu produk pelancongan berasaskan eko-pelancongan yang kaya dengan biodiversiti yang boleh dipromosikan ke peringkat antarabangsa dan domestik.

2. Antara inisiatif yang boleh dicadangkan untuk mengangkat Tanjong Manis sebagai salah sebuah produk eko-pelancongan, kebudayaan dan kesenian Malaysia adalah seperti berikut :-

- (i) Hebahan media melalui program “*Mega Familiarization Trip*” di mana para media akan dibawa untuk melihat dan merasai sendiri keindahan alam semulajadi yang terdapat di sekitar Tanjong Manis;
- (ii) Membangunkan pakej eko-pelancongan yang turut menerapkan ciri-ciri kebudayaan dan kesenian di kawasan Tanjong Manis seperti industri pembuatan songket;
- (iii) Mempromosikan produk-produk pelancongan di sekitar Tanjong Manis melalui saluran media sosial dengan menggunakan khidmat “*social media influencer*”, KOL (*Key Opinion Leaders*) dengan memfokuskan kepada Tanjong Manis dan Mukah; dan
- (iv) Menjadikan kawasan Tanjong Manis sebagai salah satu produk pelancongan pendidikan (*edu-tourism*).

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN HAJAH FUZIAH BINTI SALLEH
[KUANTAN]**

TARIKH : 9 NOVEMBER 2021 (SELASA)

SOALAN

PUAN HAJAH FUZIAH BINTI SALLEH [KUANTAN] minta **MENTERI PEMBANGUNAN WANITA, KELUARGA DAN MASYARAKAT** menyatakan :-

- (a) langkah Kementerian dalam mewujudkan pelbagai program peluang pekerjaan khususnya dari kalangan ibu tunggal dan ibu tunggal yang hilang pekerjaan akibat pandemik dan nyatakan peratusan yang berjaya kembali bekerja pada masa kini mengikut negeri; dan
- (b) bagaimanakah cara pihak Kementerian mengukur keberkesanan program dan memastikan kumpulan sasar ini mendapat akses yang baik kepada program-program tersebut.

JAWAPAN

Tuan Yang di-Pertua,

Kementerian amat prihatin dan komited untuk menjaga kebajikan wanita terutamanya wanita B40 termasuklah mereka yang bergelar ibu tunggal dan ibu tunggal, lebih-lebih lagi apabila isi rumah diketuai oleh wanita yang terkesan dari segi sosial dan ekonomi akibat pandemik COVID-19. Berdasarkan statistik Jabatan Perangkaan Negara 2019, jumlah Ketua Isi Rumah Wanita adalah 1.2 juta orang.

Untuk makluman, soal selidik yang dijalankan oleh Jabatan Pembangunan Wanita bermula 29 Jun 2021 sehingga 5 Julai 2021 yang melibatkan 23,634 responden ibu tunggal mendapati bahawa 43 peratus telah hilang pekerjaan manakala 92 peratus mempunyai pendapatan di bawah Paras Garis Kemiskinan (RM2,208) kesan daripada pandemik ini.

Bagi membantu golongan ini, Kementerian telah menyediakan program pembangunan kapasiti serta penyediaan ruang dan peluang supaya wanita-wanita ini dapat menjana pendapatan bagi memperbaiki taraf hidup mereka. Antara program penjana pendapatan untuk membantu ekonomi wanita seperti berikut:

- 1. Program Wanita Bangkit (Program yang menyediakan peluang pekerjaan dan penjana pendapatan)**
Sasaran : 2,000 orang
Pencapaian : **1,744 peserta** wanita telah mendapat pekerjaan*
- 2. Program Bantuan MyKasih Kapital:**
Pencapaian : **2,000 peserta***
(menerima insentif RM500 seorang dan melibatkan peruntukan sebanyak **RM1,000,000.00**).

**Statistik yang disediakan adalah sehingga 8 November 2021*

3. **Kolaborasi Strategik JPW dengan pelbagai pihak seperti TalentCorp dan PERKESO (menyediakan peluang pekerjaan kepada wanita)**
 - a. Program Karnival Kerjaya dan Usahawan Wanita:
 - Jumlah program telah dilaksanakan : 13 program
 - Jumlah majikan yang terlibat : 189 majikan
 - Jumlah pekerjaan yang ditawarkan : 16,751 tawaran
 - Jumlah peserta berjaya mendapatkan pekerjaan: **469 wanita***
 - b. Jumlah wanita yang berjaya kembali bekerja di bawah Program bersama PERKESO : **183,463 orang wanita***
4. **Industri Penjagaan Postnatal (Ibu Selepas Bersalin)**
 - a. **Program Penjagaan Ibu Selepas Bersalin Mamacare** ialah Program Penjagaan Ibu Selepas Bersalin Tradisional Melayu yang dipermodenkan.
 - b. Jumlah Pengamal Mamacare yang telah dilatih : **1,431 orang***
5. **Kursus Asuhan dan Didikan Awal Kanak-kanak PERMATA**

Pada tahun 2020, seramai **180 orang peserta** telah mengikuti kursus secara PERCUMA tersebut dan program ini turut diadakan pada tahun 2021.
6. **Kolaborasi Strategik bersama Kementerian Pembangunan Usahawan dan Koperasi (MEDAC)**

JPW telah melaksanakan program penjanaan pendapatan wanita melalui keusahawanan menerusi program kolaborasi strategik KPWKM dan MEDAC seperti ketetapan berikut:

 - a. TEKUN : Program Bantuan Pembiayaan Berkelompok TemanNita - **793 peserta** telah menerima pembiayaan
 - b. Perbadanan Nasional (PNS): Sebuah program keusahawanan berkonsepkan Francais - **214 peserta** mengikuti Program SWEET
 - c. INSKEN: Program INSKEN Bumiputera *Business Coaching* (IBBC) - **3,418 permohonan** telah diterima

**Statistik yang disediakan adalah sehingga 8 November 2021*

7. 2 Years Exit Programme (YEP)

- a. Jabatan Kebajikan Masyarakat (JKM) melalui Pelan Transformasi JKM telah memberi fokus dan penekanan kepada usaha ke arah pendayaupayaan klien khususnya penerima bantuan melalui pelaksanaan *productive welfare* dan program “2 Years Exit Programme” dibangunkan.
- b. Jumlah peserta program 2 YEP : **214 orang***

8. Bantuan Khas Ibu Tunggal (BKIT)

Jumlah penerima : 150,000 orang ibu tunggal

Jumlah bantuan : RM300.00 (seorang-bantuan secara *one-off*)

9. Flexible Working Arrangement

Kementerian ini juga turut menyokong penuh pelaksanaan ***Flexible Working Arrangement*** dan penyediaan taska di tempat kerja untuk menggalakkan wanita bekerja dan pada masa yang sama mewujudkan persekitaran kerja yang lebih kondusif.

Berkenaan dengan kaedah bagi mengkaji keberkesanan program, pada ketika ini, Kementerian masih mengumpul data peratusan wanita yang terlibat manakala keberkesanannya akan dinilai kemudian memandangkan kebanyakan program adalah inisiatif baharu Kementerian.

Sekian, terima kasih.

**Statistik yang disediakan adalah sehingga 8 November 2021*

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN CHIK
[BALIK PULAU]**

TARIKH : 9 NOVEMBER 2021 (SELASA)

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI PELANCONGAN, SENI DAN BUDAYA** menyatakan senarai kerja-kerja penambahbaikan aset ataupun lokasi pelancongan sepanjang tempoh pandemik berserta kos supaya destinasi berkenaan sedia mengalu-alukan kehadiran pelancong apabila pintu sempadan kembali dibuka.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Pelancongan, Seni dan Budaya telah diperuntukkan sejumlah RM70 juta bagi melaksanakan Penyelenggaraan Kemudahan Pelancongan Termasuk Pemuliharaan dan Pemeliharaan Tapak / Bangunan Warisan serta Projek-projek Di Bawah Peruntukan Kampung Budaya di seluruh negara.

2. Peruntukan bagi Penyelenggaraan Kemudahan Pelancongan Termasuk Pemuliharaan dan Pemeliharaan Tapak / Bangunan Warisan terbahagi kepada dua program iaitu Penyelenggaraan Kemudahan/ Infrastruktur Pelancongan di bawah Pembangunan RP1, RMKe-12, Tahun 2021 dan Pemerkasaan Sektor Pelancongan, Kebudayaan dan Warisan Tahun 2021. Ia melibatkan:

- (i) 84 projek Penyelenggaraan Kemudahan/ Infrastruktur Pelancongan;
- (ii) 75 projek Pemerkasaan Sektor Pelancongan, Kebudayaan dan Warisan Tahun 2021; dan
- (iii) 6 projek bagi Projek-projek di bawah Peruntukan Kampung Budaya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
(SIBUTI)**

TARIKH : 9 NOVEMBER 2021 (SELASA)

SOALAN

TUAN LUKANISMAN BIN AWANG SAUNI minta **MENTERI KANAN PENDIDIKAN** menyatakan adakah pihak Kementerian mempunyai maklumat-maklumat terkini mengenai daerah yang mempunyai masalah akademik yang rendah di seluruh Malaysia dan apakah langkah yang sedang dibuat bagi meningkatkan prestasi akademik pelajar tersebut.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan rekod Kementerian Pendidikan Malaysia (KPM), terdapat empat buah pejabat pendidikan daerah di seluruh Malaysia yang mempunyai pencapaian Gred Purata Sekolah (GPS) yang paling rendah, iaitu melebihi 6.00 mata jika dibandingkan dengan daerah-daerah lain. GPS ini adalah berdasarkan pencapaian murid dalam peperiksaan Sijil Pelajaran Malaysia (SPM) tahun 2020. Pencapaian empat daerah tersebut mengikut seliaan Pejabat Pendidikan Daerah (PPD) adalah seperti berikut:

- i. PPD Tatau/Sebauh - 6.07 mata;
- ii. PPD Simunjan - 6.03 mata;
- iii. PPD Semporna - 6.14 mata; dan
- iv. PPD Pensiangan - 6.21 mata.

KPM sentiasa berusaha meningkatkan kualiti pendidikan di semua sekolah di Malaysia. Inisiatif Program Transformasi Daerah (DTP) telah diwujudkan yang bermatlamat mengupayakan jabatan pendidikan negeri (JPN), pejabat pendidikan daerah (PPD) dan sekolah untuk menyediakan penyelesaian khusus berasaskan keperluan. Tindakan ini bertujuan mempercepatkan penambahbaikan prestasi sekolah melalui program yang sistematik yang dipimpin oleh PPD di semua negeri.

Melalui program DTP, PPD membangunkan intervensi dan menyelesaikan isu setempat. Program ini juga mendapat sokongan penuh daripada *School Improvement Partners* (SIPartners+) dan *School Improvement Specialist Coaches* (SISC+) yang memberi bimbingan serta sokongan kepada pemimpin sekolah serta guru ke arah peningkatan kualiti kepimpinan dan kualiti pengajaran.

Seterusnya mekanisme pemantauan pada setiap peringkat dilaksana bagi memastikan sekolah, daerah dan negeri berada pada landasan yang

betul. Salah satu platform yang digunakan bagi memantau prestasi ini ialah Dialog Prestasi yang membincangkan prestasi pendidikan berdasarkan data dan fakta. Melalui Dialog Prestasi ini, KPM dapat mengenal pasti kelemahan yang ada dan seterusnya dapat mengambil tindakan pembetulan yang berterusan.

Untuk makluman Ahli Yang Berhormat, dalam tempoh pandemik COVID-19 ini, KPM telah membangunkan satu kerangka holistik dalam memastikan Pengajaran dan Pembelajaran (PdP) dapat terus dilaksanakan dengan berkesan. Di samping itu, KPM akan terus menambah baik pelaksanaan Pengajaran dan Pembelajaran di Rumah (PdPR) bagi memastikan keberkesananannya dapat ditingkatkan dari semasa ke semasa.

Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Selain daripada itu, sewaktu sesi persekolahan dibuka semula sebelum ini, guru telah membuat pengesanan terhadap tahap penguasaan kemahiran murid. Ini membolehkan guru merancang dan melaksanakan intervensi yang bersesuaian sewaktu PdPR.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di

samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Selain itu, KPM telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM turut menambah lebih banyak bahan PdP melalui pelantar *Digital Educational Learning Initiative* Malaysia (DELIMa). Pelantar ini merupakan pusat rujukan sehenti yang mengandungi pelbagai aplikasi, perkhidmatan dan sumber pendidikan digital. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa. KPM juga telah menaik taraf dan menambah baik pelantar DELIMa (DELIMa 2.0) dengan fitur baharu mulai Ogos 2021. Fitur baharu ini memberi fokus kepada pengalaman pengguna, analitis data, kandungan dan pembelajaran diperibadikan.

Untuk makluman Ahli Yang Berhormat, KPM sentiasa memperkasa program latihan pembangunan profesionalisme berterusan (PPB) kepada guru. Ini termasuklah latihan yang memberi fokus kepada kemahiran digital, pedagogi dalam dan luar talian serta pentaksiran secara dalam talian dan luar talian. Berdasarkan statistik dalam Sistem Pengurusan Latihan Kementerian Pendidikan Malaysia (SPLKPM), sehingga September 2021, sebanyak 12,048 aktiviti Pembangunan Profesionalisme Berterusan (PPB) berkaitan PdPR dan 1,949 PPB berkaitan Digital/ICT telah direkodkan. Melalui aktiviti ini, seramai 84 peratus atau 352,845 guru telah mengikuti PPB dan jumlah ini dijangka akan terus meningkat sehingga akhir tahun 2021.

KPM yakin kerangka holistik yang dirancang dan dilaksanakan ini dapat meningkatkan kualiti pendidikan di semua sekolah di Malaysia.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK SERI SHAMSUL ISKANDAR @
YUSRE BIN MOHD AKIN [HANG TUAH
JAYA]**

TARIKH : 9 NOVEMBER 2021 (SELASA)

SOALAN

minta **MENTERI KOMUNIKASI DAN MULTIMEDIA** menyatakan apakah strategi dan perancangan Kementerian untuk memastikan syarikat-syarikat telekomunikasi merencanakan minat untuk membina menara telekomunikasi di kawasan luar bandar agar capaian internet yang lebih luas dapat berlaku di kawasan ini.

JAWAPAN:

Tuan Yang Dipertua,

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (SKMM) telah menghasilkan Pelan Jalinan Digital Negara (JENDELA), yang dapat bertujuan untuk menangani isu akses kepada Internet berkualiti bagi perkhidmatan tetap dan mudah alih.

Pelaksanaan JENDELA bukan sahaja tertumpu di kawasan-kawasan bandar, malah turut mengambilkira penyediaan infrastruktur digital di kawasan-kawasan luar bandar dan pedalaman melalui program Pemberian Perkhidmatan Sejagat (USP) seperti berikut:

- a. Melalui kaedah penyumbang utama, sebanyak 362 menara baharu akan dibina menjelang penghujung 2022 yang akan

meningkatkan kadar liputan 4G di kawasan berpenduduk di seluruh negara. Di samping itu juga, sebanyak 1,661 menara baharu akan dilaksana secara kaedah tender terbuka di kawasan-kawasan luar bandar dan pedalaman di seluruh negara melalui pelantikan Penyedia Perkhidmatan Sejagat yang Dilantik atau *Designated Universal Service Provision* pada suku keempat tahun 2021 untuk melonjakkan lagi kadar liputan 4G kepada 96.9% di kawasan berpenduduk di seluruh Malaysia, penghujung 2022 nanti.

Secara umumnya, pelaksanaan kesemua inisiatif JENDELA ini telah bermula sejak bulan September 2020 dan inisiatif yang dalam perancangan akan siap secara berperingkat sehingga penghujung tahun 2022. Manakala bagi perkhidmatan jalur lebar menggunakan teknologi satelit kini dalam proses pelaksanaan dan dijangka akan siap secara berperingkat bermula November 2021 sehingga awal tahun 2022.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh Rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktaraf serta premis-premis yang mendapat akses gentian optik bagi memastikan keperluan Rakyat sentiasa diutamakan.

Pihak SKMM akan mempercepatkan sedaya mungkin pembinaan menara namun ianya juga bergantung kepada kelulusan yang dikeluarkan pihak tertentu seperti Pihak Berkuasa Negeri (PBN) dan Pihak Berkuasa Tempatan (PBT). Kerjasama serta komitmen Kerajaan Negeri dan semua pihak adalah penting bagi memastikan kesemua cadangan dasar yang telah diluluskan di peringkat pusat, dapat diaplikasikan di peringkat negeri dan PBT agar penyediaan infrastruktur digital dapat dimudahcara serta mengikut piawaian yang tertentu bagi memastikan Aspirasi Nasional dapat dicapai.

Selain daripada pembinaan menara-menara telekomunikasi dan satelit, Pihak Kerajaan akan turut melaksanakan Penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hub untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Pelaksanaan PoP bagi Fasa 1 akan melibatkan 630 lokasi berhampiran sekolah manakala bagi Fasa 2 pula akan melibatkan 3693 lokasi berhampiran sekolah di kawasan luar bandar di seluruh negara. Sekurang-kurangnya sebanyak 432,300 premis akan menerima perkhidmatan jalur lebar berkelajuan tinggi apabila projek ini siap menjelang akhir RMK-12 Tahun 2025.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : DATUK WIRA DR. MOHD HATTA BIN MD
RAMLI [LUMUT]
TARIKH : 09 NOVEMBER 2021 (SELASA)

SOALAN

DATUK WIRA DR. MOHD HATTA BIN MD RAMLI [LUMUT] minta **MENTERI KEWANGAN** menyatakan sama ada jumlah Judi Cabutan Khas (special draw) akan dikaji semula dalam masa terdekat.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Kewangan komited untuk tidak menambah bilangan cabutan khas melebihi daripada siling yang ditetapkan, serta tidak mengeluarkan lesen baru bagi sebarang operasi perjudian. Ini adalah selaras dengan dasar semasa Kerajaan untuk tidak menggalakkan perjudian.

Sebagai langkah kawalan, Kementerian Kewangan juga telah menetapkan syarat-syarat yang ketat kepada pemegang lesen bagi memastikan industri perjudian dapat dikawal dengan berkesan. Tambahan lagi, kerjasama dengan agensi-agensi berkaitan akan ditingkatkan untuk memerangi aktiviti perjudian haram.

Kementerian Kewangan mengambil maklum cadangan yang dikemukakan oleh Yang Berhormat, dan sedang meneliti cadangan bilangan cabutan khas. Ini terutamanya dari segi kesan langkah tersebut terhadap peningkatan perjudian haram, serta aspek perniagaan operator agensi nombor ramalan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' SRI HASAN BIN ARIFIN (ROMPIN)

TARIKH : 9 NOVEMBER 2021 (SELASA)

SOALAN

DATO' SRI HASAN BIN ARIFIN minta **MENTERI KANAN PENDIDIKAN** menyatakan apakah perkembangan terkini cadangan mengenai pewujudan jawatan pembantu guru yang berperanan membantu guru-guru melaksanakan tugas pentadbiran.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan pelantikan pembantu guru secara rintis di Melaka dan Kedah pada tahun 2013 sehingga 2019. Kaedah pelantikan pembantu guru ini adalah secara Pekerja Sambilan Harian (PSH).

Untuk makluman Ahli Yang Berhormat, program ini telah diberhentikan pada Disember 2019 kerana memberi implikasi kewangan yang besar kepada Kerajaan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN WONG KAH WOH
[IPOH TIMUR]**

TARIKH : 9 NOVEMBER 2021 (SELASA)

SOALAN

Minta **MENTERI PENGAJIAN TINGGI** menyatakan pencapaian Pusat Pengajian Pendidikan Jarak Jauh (PPPJJ) Universiti Sains Malaysia (USM) serta sebab kenapa PPPJJ USM perlu dibubarkan.

JAWAPAN

Tuan Yang Di-Pertua,

Sehingga hari ini, Pusat Pengajian Pendidikan Jarak Jauh (PPPJJ), Universiti Sains Malaysia (USM) telah melahirkan kira-kira 30,000 alumni melalui program pengajian yang ditawarkan. Di peringkat antarabangsa, PPPJJ USM turut menjalin kolaborasi dengan pusat utama pendidikan jarak jauh (PJJ) global seperti Deakin University dan Murdoch University di Australia, serta Open Learning Institute di Kanada dalam usaha memperkaya penghasilan bahan pengajaran dan pembelajaran untuk manfaat pengajar dan pelajar. Keupayaan dan, dengan izin, *'track record'* ini membuktikan bahawa PPPJJ USM berpotensi dikembangkan selari dengan konsep pembelajaran sepanjang hayat.

Dalam hubungan ini, pihak USM sentiasa berusaha untuk terus memperkasakan program akademik yang ditawarkan oleh PPPJJ USM dengan melihat peluang yang ada berdasarkan senario semasa. Justeru, satu pasukan petugas yang terdiri daripada tiga orang profesor dalam kalangan ahli senat universiti telah dilantik oleh Senat USM untuk mengkaji keperluan penstrukturan semula PPPJJ USM yang seterusnya berupaya memantapkan lagi kaedah penyampaian program akademik yang ditawarkan. Dapatan kajian tersebut dijadual untuk dibentangkan kepada Senat USM pada penghujung bulan November 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN LOKE SIEW FOOK [SEREMBAN]
TARIKH : 09 NOVEMBER 2021 (SELASA)

SOALAN

TUAN LOKE SIEW FOOK [SEREMBAN] minta **MENTERI KEWANGAN** menyatakan model kenderaan rasmi yang digunakan oleh Anggota-anggota Pentadbiran Kerajaan Persekutuan, syarikat pembekal kenderaan tersebut, kos bulanan untuk setiap kenderaan serta jumlah kenderaan yang dibekalkan.

JAWAPAN

Tuan Yang di-Pertua,

Untuk makluman ahli Yang Berhormat, model Kenderaan Rasmi Jawatan (KRJ) yang digunakan oleh Anggota-anggota Pentadbiran Kerajaan Persekutuan yang terkini adalah seperti berikut:

- a. Toyota Vellfire 2.5L bagi kegunaan Menteri-Menteri Persekutuan, menggantikan Proton Perdana 2.4L Executive (Premium); dan
- b. Toyota Camry 2.5V bagi kegunaan Timbalan Menteri Persekutuan yang akan menggantikan Proton Perdana 2.4L Executive secara berperingkat, dan apabila tamat tempoh pajakan.

Kenderaan-kenderaan tersebut dibekalkan oleh Spanco Sdn. Bhd. menerusi kaedah pajakan selaku syarikat konsesi yang bertanggungjawab menguruskan fleet kenderaan Kerajaan Malaysia semenjak 1994.

Dari segi kos sewaan bulanan Kenderaan Rasmi Jawatan tersebut, Kerajaan menanggung:

- a. RM4,851.61 bagi Toyota Vellfire 2.5L, berbanding RM4,854.41 bagi kos sewaan Proton Perdana 2.4L Executive (Premium); dan
- b. RM2,911.00 bagi Toyota Camry 2.5V, berbanding RM3,309.48 bagi kos sewaan Proton Perdana 2.4L Executive.

Setakat akhir Oktober 2021, jumlah KRJ yang dibekalkan adalah:

- c. 32 unit Toyota Vellfire 2.5L; dan
- d. dua (2) unit Toyota Camry 2.5V.

Tuan Yang di-Pertua,

Izinkan saya untuk menekankan bahawa keputusan Kerajaan untuk mengganti KRJ adalah kerana model Proton Perdana 2.4 Premium telahpun ditamatkan pengeluarannya pada tahun 2014. Ini memberi implikasi yang besar terhadap kos penggunaan kereta untuk jangka masa panjang susulan ketersediaan alat ganti yang terhad, serta kebolehpercayaan kereta tersebut untuk digunapakai bagi tahun-tahun yang seterusnya, terutamanya dari segi aspek keselamatan dan pencemaran udara melalui pelepasan gas rumah hijau yang tinggi. Untuk makluman ahli Yang Berhormat, usia KRJ ada yang mencecah 6 tahun bagi Jemaah Menteri, sedangkan penggantian KRJ bagi Jemaah Menteri adalah dijadualkan untuk setiap 4 tahun sekali.

Tambahan lagi, seperti yang dinyatakan oleh Kementerian Kewangan melalui Kenyataan Media bertarikh 7 November 2021, cadangan penggantian kereta Proton Perdana kepada kenderaan lain seperti Vellfire telahpun dipertimbangkan semasa pentadbiran Kerajaan terdahulu, tetapi ditangguhkan dan hanya dilaksanakan pada tahun ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN SU KEONG SIONG [KAMPAR]
TARIKH : 09 NOVEMBER 2021 (SELASA)

SOALAN

TUAN SU KEONG SIONG [KAMPAR] minta **MENTERI KEWANGAN** menyatakan secara terperinci jumlah peruntukan dan bilangan penerima Geran Khas Prihatin (GKP) sejak pelaksanaan. Nyatakan syarat kelulusan dan/atau kelayakan untuk menerima Geran Khas Prihatin (GKP 4.0).

JAWAPAN

Tuan Yang di-Pertua,

Secara keseluruhannya, sejumlah **6.08 bilion ringgit** dimanfaatkan oleh lebih 1 juta usahawan mikro melalui empat siri bayaran GKP semenjak wabak COVID-19 melanda negara.

Setakat hari ini, jumlah peruntukan yang telah disalurkan adalah berjumlah **5.58 bilion ringgit**. Namun, masih ada lagi bantuan yang akan disalurkan pada bulan ini (November 2021) melalui GKP 4.0 Fasa ke-2 berjumlah **500 juta ringgit**.

Untuk makluman ahli-ahli Yang Berhormat, syarat kelayakan GKP sedia ada adalah seperti berikut:

- a. Pertama, pemohon mestilah berstatus warganegara Malaysia;

- b. Kedua, pemohon mesti mempunyai jumlah jualan atau perolehan tahunan kurang daripada 300,000 ringgit, dan jumlah pekerja sepenuh masa tidak melebihi 4 orang iaitu tidak termasuk pemilik;
- c. Ketiga, pemohon mesti berdaftar dengan Suruhanjaya Syarikat Malaysia, Pihak Berkuasa Tempatan atau Lembaga Hasil Dalam Negeri Malaysia; dan
- d. Akhir sekali, pemohon masih aktif menjalankan perniagaan semasa permohonan dibuat.

Ingin saya menekankan bahawa syarat kelayakan sedia ada adalah sangat minima, dan tidak terlalu ketat. Malah, pada bulan Julai yang lalu, Kementerian Kewangan telah membuka permohonan baharu GKP 4.0 kepada usahawan mikro yang tidak lulus GKP sebelum ini. Kerajaan juga telah membuka untuk permohonan baharu sebanyak empat kali iaitu PKS mikro perlu berdaftar sebelum 31 Disember 2019 bagi GKP 1.0; 31 Ogos 2020 bagi GKP 2.0; 28 Februari 2021 bagi GKP 3.0; dan 30 Jun 2021 bagi GKP 4.0.

Data penerima bantuan GKP adalah berdasarkan data terkini pendaftaran SSM, PBT dan LHDNM. Penerima yang layak untuk menerima bantuan GKP 4.0 adalah melibatkan penerima sedia ada (GKP 1.0, 2.0 dan 3.0) yang berstatus lulus dan berjaya kredit, serta penerima baharu GKP 4.0.

Syarat-syarat ini dikenakan bagi memastikan tiada ketirisan, serta usahawan mikro yang betul-betul layak mendapat bantuan bagi menghadapi cabaran COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : DATUK SERI MOHD REDZUAN YUSOF
[ALOR GAJAH]
TARIKH : 09 NOVEMBER 2021 (SELASA)

SOALAN

DATUK SERI MOHD REDZUAN YUSOF [ALOR GAJAH] minta **MENTERI KEWANGAN** menyatakan anggaran pecahan perbelanjaan dan simpanan baki setelah perbelanjaan golongan B40 dan M40 bagi memastikan penyediaan bajet pada masa akan datang mampu meringankan beban rakyat yang terkesan akibat pandemik COVID-19.

JAWAPAN

Tuan Yang-di-Pertua,

Untuk makluman ahli Yang Berhormat, sebagai konteks izinkan saya untuk berkongsi beberapa fakta berdasarkan Laporan Survei Pendapatan dan Perbelanjaan Isi Rumah 2019 yang diterbitkan oleh Jabatan Perangkaan Malaysia:

- a. Kumpulan B40 mempunyai pendapatan purata sebanyak RM3,152 manakala M40 pula ialah RM7,348;
- b. Kumpulan B40 memperuntukkan 25.6 peratus perbelanjaannya ke atas perumahan berbanding hanya 22.8 peratus oleh M40.
- c. Perbelanjaan ke atas makanan juga menunjukkan komposisi lebih tinggi sebanyak 24.2 peratus bagi B40 berbanding 18.0 peratus oleh M40.
- d. Bagi perbelanjaan pengangkutan, B40 membelanjakan 10.8 peratus dan M40 membelanjakan 13.5 peratus.
- e. Namun, bagi perbelanjaan ke atas perkhidmatan restoran dan hotel, M40 merekodkan komposisi lebih tinggi iaitu 14.5 peratus, sementara kumpulan B40 adalah 12.6 peratus.
- f. Kumpulan M40 memperuntukkan 2.0 peratus dan 1.4 peratus masing-masing untuk Kesihatan dan Pendidikan. Sementara itu, kumpulan B40 hanya memperuntukkan 0.9 peratus untuk Pendidikan dan 2.0 peratus untuk Kesihatan.

Namun, susulan pandemik COVID-19 yang melanda negara pada Mac 2020, penutupan ekonomi secara keseluruhan melalui pelaksanaan PKP 1.0 telah mendesak golongan B40 dan M40 untuk menggunakan simpanan mereka dalam menampung keperluan kehidupan seharian.

Sebagai contoh, pengeluaran simpanan KWSP oleh ahli melalui program i-Lestari, i-Sinar dan i-Citra telah merekodkan jumlah lebih dari 100 bilion ringgit. Akibat daripada ini, didapati bahawa lebih dari 70 peratus daripada ahli tidak mempunyai simpanan yang mencukupi untuk

bersara di bawah paras garis kemiskinan (PGK). Daripada 15.1 juta ahli KWSP, seramai 6.1 juta ahli mempunyai baki simpanan kurang daripada 10 ribu ringgit, manakala seramai 3.6 juta ahli mempunyai baki kurang daripada satu ribu ringgit.

Tidak dinafikan, perkara ini amatlah membimbangkan. Kerajaan komited untuk melindungi kesejahteraan rakyat pada masa kini dan di masa depan. Ini adalah terutamanya dari segi kecukupan simpanan persaraan di hari tua bagi mengelakkan isu sosial yang lebih besar.

Tuan Yang-di-Pertua,

Tahun 2022 dijangka sebagai tahun pemulihan, di mana sektor ekonomi dijangka akan dibuka sepenuhnya. Oleh itu, di bawah Bajet 2022, Kerajaan akan memastikan peluang untuk mendapatkan pekerjaan dan menjana pendapatan adalah lebih baik supaya golongan B40 dan M40 khususnya dapat membina semula kehidupan dan mempunyai lebihan pendapatan untuk kembali menyimpan bagi hari persaraan. Antaranya adalah melalui inisiatif JaminKerja, di mana sebanyak 600 ribu peluang pekerjaan baharu bakal diwujudkan dengan peruntukan berjumlah 4.8 bilion ringgit. Inisiatif ini penting supaya kadar pengangguran dapat diturunkan kepada 4 peratus menjelang penghujung 2022.

Pada masa yang sama, di bawah Bajet 2022 juga, Kerajaan komited untuk terus membantu golongan yang terjejas akibat COVID-19, tidak kira golongan B40 atau M40.

Bagi golongan B40, antara langkah yang diperkenalkan termasuklah:

- a. menambah baik bantuan tunai di bawah inisiatif Bantuan Keluarga Malaysia (BKM) dengan peruntukan berjumlah 8.2 bilion ringgit, dan dijangka memanfaatkan 9.6 juta penerima. Sebagai pembaharuan, ibu atau bapa tunggal yang mempunyai anak tanggungan dan berpendapatan bulanan sehingga 5,000 ringgit akan menerima tambahan sebanyak 500 ringgit. Selain itu, bantuan tambahan

sebanyak 300 ringgit lagi turut diberikan kepada isi rumah warga emas;

- b. memastikan pendidikan berkualiti melalui peruntukan berjumlah 450 juta ringgit untuk Bantuan Awal Persekolahan. Melalui Bajet 2022, bantuan ini telah ditingkatkan sebanyak 50 ringgit, di mana Keluarga Malaysia yang layak akan menerima 150 ringgit untuk menampung keperluan sekolah;
- c. pemberian tablet kepada golongan siswa B40 yang melanjutkan pengajian tinggi melalui inisiatif PerantiSiswa. Inisiatif ini telah diperuntukkan 450 juta ringgit oleh Kerajaan, di mana syarikat telekomunikasi akan turut menyumbang sejumlah 65 juta ringgit bagi menjayakan program ini;
- d. meningkatkan nilai baucar Perlindungan Tenang kepada 75 ringgit, di mana ini juga boleh digunakan untuk membeli polisi insurans motosikal;
- e. meringankan kos perubatan dan kesihatan melalui perluasan skim MySalam kepada penerima BKM. Manfaat tuntutan kos peranti perubatan juga akan dipanjangkan kepada anak tanggungan penerima mySalam yang layak;
- f. mengedarkan kit asas kebersihan diri setiap bulan kepada 130 ribu remaja wanita secara percuma. Inisiatif ini akan dilaksanakan melalui Lembaga Penduduk dan Pembangunan Keluarga Malaysia, dengan kerjasama Jabatan Penjara Malaysia dan diperuntukkan 10 juta ringgit; dan
- g. menyediakan subsidi pembelian kerusi keselamatan kanak-kanak sebanyak 50 peratus atau sehingga 150 ringgit untuk menggalakkan penggunaan kerusi keselamatan di dalam kereta. Sejumlah 30 juta ringgit disediakan untuk tujuan ini dan bakal memanfaatkan 188 ribu keluarga; dan

- h. pengkreditan e-tunai bernilai 150 ringgit secara *one-off* untuk golongan belia melalui Skim Transaksi Tanpa Tunai, atau *e-Start*.
8. Selanjutnya, **untuk golongan M40**, Bajet 2022 **telah menyediakan pelbagai pengecualian dan pelepasan cukai** yang bakal memberi penjimatan, dan pada masa yang sama, menggalakkan perbelanjaan demi merangsang ekonomi. Ini termasuklah:
- a. tidak mengenakan cukai keuntungan harta tanah bagi pelupusan mulai tahun ke enam dan ke atas;
 - b. pengecualian cukai jualan kereta; dan
 - c. pelepasan khas cukai pendapatan individu bagi pembelian komputer, perbelanjaan menghadiri kursus peningkatan kemahiran, pelancongan domestik dan lain lain.

Secara keseluruhan, kesemua pendekatan yang dilaksanakan Kerajaan mempunyai objektif yang sama, iaitu meringankan aliran tunai dan beban golongan B40 dan M40 tanpa mengira bangsa, agama dan kaum.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN NOOR AMIN BIN AHMAD
[KANGAR]
TARIKH : 09 NOVEMBER 2021 (SELASA)

SOALAN

TUAN NOOR AMIN BIN AHMAD [KANGAR] minta **MENTERI KEWANGAN** menyatakan jumlah perbelanjaan mengurus dan perbelanjaan pembangunan mengikut negeri sepanjang RMK-11 dan unjuran jumlah perbelanjaan mengurus dan perbelanjaan pembangunan mengikut negeri sepanjang RMK12.

JAWAPAN

Tuan Yang di-Pertua,

Untuk makluman Yang Berhormat, jumlah kedua-dua perbelanjaan mengurus dan perbelanjaan pembangunan sepanjang RMKe-11, iaitu bagi tempoh 2016 sehingga 2020, adalah berjumlah 1.4 trillion ringgit. Ini merangkumi perbelanjaan mengurus sebanyak 1.2 trillion ringgit, dan perbelanjaan pembangunan berjumlah 248 bilion ringgit.

Bagi unjuran perbelanjaan mengurus dan perbelanjaan pembangunan mengikut negeri sepanjang RMKe-12 bagi tempoh 2021 sehingga 2025, data unjuran tidak dapat disediakan mengikut negeri mengambil kira penetapan siling peruntukan akan disediakan secara tahunan melalui penyediaan anggaran perbelanjaan persekutuan.

Namun, seperti yang diumumkan semasa pembentangan RMKe-12, sejumlah 400 bilion ringgit akan diperuntukkan bagi perbelanjaan pembangunan, dan ini merupakan jumlah terbesar pernah diusulkan. Sebahagian besar daripada jumlah ini akan digunakan untuk perbelanjaan projek-projek sambungan, termasuklah bagi membantu memulihkan Lembaga Kemajuan Tanah Persekutuan (Felda) dan Lembaga Tabung Haji.

Walau bagaimanapun, anggaran perbelanjaan mengurus dan pembangunan bagi tahun 2022 seperti mana pembentangan Bajet 2022 adalah sebanyak 311.1 bilion ringgit dengan pecahan peruntukan perbelanjaan mengurus sebanyak 233.5 bilion ringgit. Manakala perbelanjaan pembangunan berjumlah 77.6 bilion ringgit akan diperuntukkan, termasuk perbelanjaan simpanan luar jangka sebanyak 2.0 bilion ringgit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA HAJI MOHD. ANUAR MOHD.
TAHIR
[TEMERLOH]**

TARIKH : 9 NOVEMBER 2021 (SELASA)

SOALAN

Minta **MENTERI PENGAJIAN TINGGI** menyatakan penjelasan pemerkasaan TVET di era “Industrial Revolution 4.0” termasuk berkaitan kerjasama industri bagi meningkatkan kebolehpasaran graduan. Laporan audit baru-baru ini mengenal pasti kelemahan dalam penyampaian dan akreditasi, perakuan akreditasi, penilaian kecekapan tenaga pengajar dan pengurusan pembiayaan pinjaman pelajaran.

JAWAPAN

Tuan Yang di-Pertua,

Kementerian Pengajian Tinggi (KPT) sentiasa komited dalam memastikan kualiti program TVET relevan dan menepati keperluan industri. Pelbagai usaha dilaksanakan merangkumi penambahbaikan dasar sedia ada yang berkaitan dan juga dari aspek pengoperasian institusi TVET. Hal ini penting bagi memastikan TVET terus diperkasakan khususnya dalam mendepani era “Industrial Revolution (IR) 4.0”.

Dalam hubungan ini, perkara berikut dilaksanakan secara tuntas oleh KPT melalui Jabatan Pendidikan Politeknik dan Kolej Komuniti (JPPKK):

- (i) **Menerbitkan Garis Panduan Reka Bentuk dan Penyampaian Kurikulum TVET.** Dokumen ini menjadi sumber rujukan umum tentang reka bentuk dan penyampaian untuk program-program TVET di peringkat pendidikan tinggi kepada penyedia pendidikan TVET, industri, pelajar, ibu bapa dan mana-mana individu yang berminat dengan TVET;
- (ii) **Mewujudkan kod amalan, iaitu *Code of Practice for TVET Programme Accreditation* (COPTPA).** Dokumen yang dibangunkan dengan kerjasama Agensi Kelayakan Malaysia (MQA) ini menggariskan skop program TVET dan standard minimum pelbagai keperluan khusus program TVET sebagai rujukan kepada Pemberi Pendidikan Tinggi dalam penawaran dan jaminan kualiti program pengajian;
- (iii) **Melaksanakan inisiatif perkongsian pintar Kementerian dengan pihak berkepentingan melalui Program 4IR Flagships.** Terdapat lapan projek terlibat merangkumi pelbagai bidang seperti *Autonomous Vehicle*, *Cyber Security*, dan *Agriculture/Aquaculture*. Tujuan inisiatif ini adalah untuk melengkapkan ekosistem yang holistik dalam mengaplikasi teknologi 4IR merangkumi latihan

kepada pensyarah serta penyediaan infrastruktur dan infostruktur berasaskan 4IR.

- (iv) **Memperkasakan pensyarah melalui latihan peningkatan kompetensi.** Ini dapat dijayakan melalui pelaksanaan Program Kepimpinan Instruksional dan Pembangunan Andragogi (KIPA) dan menggalakkan pensyarah menjalani sangkutan industri.
- (v) **Memperkukuh tadbir urus dan penyelarasan inisiatif memperkasakan TVET merentasi Kementerian melalui penubuhan Majlis TVET Negara.** MTVET berfungsi untuk memperhalusi isu-isu seperti ketidakselarasan tadbir urus TVET; dan
- (vi) **Menjalin kolaborasi strategik dengan badan pengiktirafan antarabangsa, iaitu Sydney Accord dan Dublin Accord melalui Lembaga Jurutera.** Ini sebagai pemangkin kepada pembangunan bakat graduan TVET agar setanding dengan kualiti antarabangsa.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : DATUK SERI DR. HAJI DZULKEFLY BIN AHMAD [KUALA SELANGOR]
TARIKH : 09 NOVEMBER 2021 (SELASA)

SOALAN

DATUK SERI DR. HAJI DZULKEFLN AHMAD [KUALA SELANGOR] minta **MENTERI KEWANGAN** menyatakan polisi pelaksanaan 'windfall tax' ke atas sektor yang lain seperti pembuatan, di samping sektor komoditi seperti kelapa sawit.

JAWAPAN

Tuan Yang di-Pertua,

Untuk makluman Ahli Yang Berhormat, levi keuntungan luar biasa dikenakan ke atas keuntungan yang melebihi nilai ambang tertentu. Bagi barangan siap pengguna, terdapat pelbagai jenis, standard, spesifikasi, serta gred yang berbeza-beza mengikut permintaan pasaran.

Oleh itu, adalah sukar untuk menentukan harga pasaran yang seragam bagi barangan siap pengguna dan menetapkan nilai ambang yang berkaitan. Ini juga berisiko menyebabkan isu ketidakadilan dari segi kadar levi yang akan dikenakan. Mengambil kira faktor-faktor ini, Kerajaan tidak berhasrat mengenakan levi keuntungan luar biasa ke atas sektor lain seperti pembuatan barangan siap pengguna, mahupun sektor perkhidmatan.

Walaupun hampir semua sektor ekonomi terjejas berikutan pandemik COVID-19, masih terdapat industri yang mengaut keuntungan luar biasa semasa krisis ini. Sehubungan itu, seperti yang telah diumumkan dalam Bajet 2022, syarikat yang menjana pendapatan melebihi 100 juta ringgit bagi tahun kewangan 2022 akan dikenakan Cukai Makmur.

Cukai ini akan dikenakan secara, dengan izin, *one-off* sahaja, dan **akan dikenakan di peringkat syarikat, dan bukan di peringkat pengeluaran akhir, atau barangan siap**. Hasil daripada cukai ini akan dibelanjakan bagi menyokong inisiatif Kerajaan dalam memperkukuhkan kedudukan kesihatan awam negara, dan memelihara kesejahteraan rakyat, terutamanya bagi mereka yang amat terjejas oleh pandemik ini.

Selain itu, untuk pengetahuan Ahli Yang Berhormat, terdapat beberapa syarikat korporat yang menyokong dan bersetuju bahawa bahawa Cukai Makmur ini akan membenarkan syarikat yang mempunyai asas kukuh untuk menyumbang kepada usaha Kerajaan. Pengenaan cukai khas ini juga tidak akan menjejaskan pembayaran dividen mereka.

Melangkah ke hadapan, Kerajaan akan membentangkan Akta Tanggungjawab Fiskal pada 2022 di Dewan Yang Mulia ini dengan tujuan untuk meningkatkan tadbir urus, akauntabiliti dan ketelusan dalam pengurusan fiskal negara bagi memastikan kemampuan fiskal dan menyokong kestabilan ekonomi makro. Ini juga akan melihat pelaksanaan Strategi Hasil Jangka Sederhana (MTRS) yang menggariskan pelaksanaan langkah hasil secara berperingkat, semakin semula perundangan cukai dan pemodenan pentadbiran hasil.

Selain itu, Kerajaan juga sedang melaksanakan Semakan Perbelanjaan Awam, atau dengan izin, *Public Expenditure Review* dengan kerjasama Bank Dunia bagi memastikan kecekapan dan keberkesanan perbelanjaan awam tanpa menjejaskan sistem penyampaian awam. Ini akan meningkatkan produktiviti perbelanjaan awam bagi memastikan nilai faedah terbaik bagi setiap ringgit cukai yang dibayar oleh rakyat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN RUSNAH BINTI ALUAI [TANGGA
BATU]**

TARIKH : 9 NOVEMBER 2021 (SELASA)

SOALAN

minta **MENTERI KOMUNIKASI DAN MULTIMEDIA** menyatakan adakah Kementerian berhasrat menaik taraf liputan 4G buat masa ini di kawasan yang mempunyai liputan yang teruk terutama sekali di luar bandar yang mana penduduknya akan tetap kekal dengan peranti 4G untuk jangka masa panjang.

JAWAPAN

Tuan Yang Dipertua,

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (SKMM) telah menghasilkan Pelan Jalinan Digital Negara (JENDELA), yang bertujuan untuk menangani isu akses kepada Internet berkualiti bagi perkhidmatan tetap dan mudah alih.

Pelaksanaan pelan JENDELA Fasa 1 yang bermula pada September 2020 memberi fokus kepada peluasan liputan gentian optik dan pembangunan infrastruktur digital termasuk pembinaan tapak 4G baharu dan menaiktaraf stesen pemancar sedia ada kepada 4G bagi meningkatkan liputan dan kualiti perkhidmatan 4G di seluruh negara. Pencapaian JENDELA sehingga 30 September 2021 adalah seperti berikut:

- a) Penambahan sebanyak 1.47 juta premis daripada 4.96 juta premis yang menjadikan jumlah keseluruhan sebanyak 6.43 juta premis di seluruh negara telah disediakan dengan akses gentian optik;
- b) Kelajuan jalur lebar mudah alih meningkat daripada 25Mbps kepada 31.34 Mbps; dan
- c) Peluasan liputan jalur lebar mudah alih 4G daripada 91.8% kepada 94.03% di kawasan berpenduduk sehingga suku kedua 2021

Pihak Kerajaan juga sedang di dalam proses untuk menutup rangkaian 3G agar spektrum yang digunakan dapat digunakan untuk meningkatkan kecekapan perkhidmatan teknologi 4G yang dapat menyediakan kelajuan capaian internet yang lebih tinggi. Sehingga 30 September 2021, sebanyak 1.2 juta pelanggan 3G sedia ada telah beralih kepada 4G dan 78,000 rangkaian 3G telah ditutup untuk menambahbaik liputan dan kualiti perkhidmatan teknologi 4G.

Pelaksanaan JENDELA bukan sahaja tertumpu di kawasan-kawasan bandar, malah turut mengambilkira penyediaan infrastruktur digital di kawasan-kawasan luar bandar dan pedalaman melalui program Pemberian Perkhidmatan Sejagat (USP) seperti berikut:

- a. Melalui kaedah penyumbang utama, sebanyak 362 menara baharu akan dibina menjelang penghujung 2022 yang akan meningkatkan kadar liputan 4G di kawasan berpenduduk di seluruh negara. Di samping itu juga, sebanyak 1,661 menara baharu akan dilaksanakan secara kaedah tender terbuka di kawasan-kawasan luar bandar dan pedalaman di seluruh negara melalui pelantikan Penyedia Perkhidmatan Sejagat yang Dilantik atau *Designated Universal Service Provision* pada suku keempat tahun 2021 untuk melonjakkan lagi kadar liputan 4G kepada 96.9% di kawasan berpenduduk di seluruh Malaysia, penghujung 2022 nanti.

- b. Manakala di kawasan pedalaman di Sabah dan Sarawak serta perkampungan Orang Asli, penyediaan perkhidmatan jalur lebar akan dipercepatkan melalui penyediaan perkhidmatan jalur lebar secara kolektif menggunakan teknologi satelit. Bagi tujuan ini, sebanyak 839 lokasi di seluruh negara telah dikenalpasti bagi memastikan ianya dapat memberikan liputan jalur lebar di kawasan-kawasan yang sukar diakses dengan teknologi gentian optik dan mudah alih.

Secara umumnya, pelaksanaan kesemua inisiatif JENDELA ini telah bermula sejak bulan September 2020 dan inisiatif yang dalam perancangan akan siap secara berperingkat sehingga penghujung tahun 2022. Manakala bagi perkhidmatan jalur lebar menggunakan teknologi satelit kini dalam proses pelaksanaan dan dijangka akan siap secara berperingkat bermula November 2021 sehingga awal tahun 2022.

Manakala peratusan liputan 4G di kawasan berpenduduk di seluruh negara telah meningkat kepada 94.03% setakat suku kedua 2021 berbanding 91.8% sebelum pelaksanaan JENDELA. Selain itu, usaha penambahbaikan rangkaian akan diteruskan untuk memberikan kualiti pengalaman yang lebih baik kepada pengguna.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh Rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktaraf serta premis-premis yang mendapat akses gentian optik bagi memastikan keperluan Rakyat sentiasa diutamakan. Pihak SKMM akan mempercepatkan sedaya mungkin pembinaan menara namun ianya juga bergantung kepada kelulusan yang dikeluarkan pihak tertentu seperti Pihak Berkuasa Negeri (PBN) dan Pihak Berkuasa Tempatan (PBT). Kerjasama serta komitmen Kerajaan Negeri dan semua pihak adalah penting bagi memastikan kesemua cadangan dasar yang telah diluluskan di peringkat pusat, dapat diaplikasikan di peringkat negeri dan PBT agar penyediaan infrastruktur digital dapat dimudahcara serta mengikut piawaian yang tertentu bagi memastikan Aspirasi Nasional dapat dicapai.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

DARIPADA : TUAN WONG KAH WHO [IPOH TIMUR]

TARIKH : 09 NOVEMBER 2021 (SELASA)

SOALAN

TUAN WONG KAH WOH [IPOH TIMUR] minta **MENTERI KEWANGAN** menyatakan jumlah hartanah yang berjaya dijual hasil daripada pelaksanaan House Ownership Campaign (HOC) pada tahun 2019 sehingga kini. Berapa anggaran pengecualian cukai setem yang telah dimanfaatkan oleh pembeli-pembeli rumah.

JAWAPAN

Tuan Yang di-Pertua,

Untuk makluman Ahli Yang Berhormat, sejak tahun 2019 hingga bulan Ogos 2021, jumlah hartanah yang berjaya dijual di bawah *Home Ownership Campaign*, atau HOC *dengan izin*, adalah sebanyak 82,201 unit dengan nilai jualan mencecah 38.29 bilion ringgit.

Manakala jumlah duti setem yang telah dikecualikan di bawah kempen ini bagi tempoh yang sama adalah sebanyak 274 juta ringgit. Inisiatif ini telah membantu mengurangkan kos awal berkaitan dengan pembelian rumah, terutamanya bagi golongan belia yang baru menjejak kaki dalam dunia pekerjaan.

Melangkah ke hadapan, Kerajaan akan menumpukan usaha terhadap pemilikan rumah oleh golongan yang tiada bukti pendapatan tetap, atau yang berkecimpung dalam ekonomi gig. Seperti yang diumumkan semasa Bajet 2022, ini akan dilaksanakan melalui Skim Jaminan Kredit Perumahan (SJKP) dengan peruntukan 2 bilion ringgit. Tambahan lagi, semua projek perumahan membabitkan Projek Perumahan Rakyat (PPR), penyediaan rumah di bawah Syarikat Perumahan Negara Berhad (SPNB) dan Perbadanan PR1MA Malaysia akan diteruskan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN JUNE LEOW HSIAD HUI
[HULU SELANGOR]**

TARIKH : 9 NOVEMBER 2021 (SELASA)

SOALAN

Minta **MENTERI PENGAJIAN TINGGI** menyatakan berapa ramai golongan sasar dari kalangan B40, Ibu tunggal dan golongan belia mengikut pembelajaran sepanjang hayat di Kolej Komuniti bagi tahun 2019, 2020 dan 2021.

JAWAPAN

Tuan Yang di-Pertua,

Penubuhan Kolej Komuniti adalah selaras dengan matlamat menyediakan akses yang meluas kepada program TVET yang berkualiti dan diiktiraf. Selain itu, ia berperanan memperkasa komuniti melalui Pembelajaran Sepanjang Hayat (PSH) serta melahirkan graduan yang holistik dan seimbang serta bercirikan keusahawanan dengan menawarkan program pembelajaran sepanjang hayat (PSH) yang bertujuan meningkatkan kemahiran dan pengetahuan serta sosio ekonomi komuniti.

Bagi tempoh 3 tahun terkini iaitu pada tahun 2019, 2020 dan 2021, jumlah keseluruhan penyertaan program PSH di Kolej Komuniti bagi **golongan B40** adalah **seramai 107,787 peserta, ibu tunggal seramai 5,176 peserta dan belia seramai 159,712 peserta.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN VIVIAN WONG SHIR YEE
[SANDAKAN]**

TARIKH : 9 NOVEMBER 2021 (SELASA)

SOALAN

PUAN VIVIAN WONG SHIR YEE [SANDAKAN] minta **MENTERI TENAGA DAN SUMBER ASLI** menyatakan:

- (a) apakah Indeks Purata Gangguan Sistem (SAIDI) yang disasarkan untuk Sabah untuk tahun 2020 dan apakah SAIDI sebenar yang telah dicapai; dan
- (b) mengapa SAIDI untuk Sabah kekal tertinggi antara semua negeri di negara ini untuk sekian lamanya dan bagaimana Kementerian merancang untuk mengurangkannya untuk setanding dengan negeri lain

JAWAPAN

Tuan Yang di-Pertua,

1. Bagi tahun 2020, Kerajaan telah menetapkan sasaran pengurangan SAIDI di Sabah pada kadar 150 minit/pengguna/tahun. Sasaran ini ditetapkan dengan menggunakan data daripada sistem pemantauan lama iaitu LGB Net yang digunakan oleh Sabah Electricity Sdn. Bhd. (SESB) tanpa mengambil kira gangguan besar dan kerja-kerja penambahbaikan sistem. Walau bagaimanapun, pencapaian SAIDI di Sabah bagi tahun 2020 adalah pada kadar 189.43 minit/pengguna/tahun, lebih tinggi daripada sasaran yang telah ditetapkan.

2. Namun demikian, dengan mengambil kira bahawa SESB telah mengguna pakai sistem baharu yang dapat memantau gangguan dengan lebih tepat iaitu penggunaan sistem ECOMMS, Kementerian telah memutuskan supaya pengiraan SAIDI bagi tahun 2021 menggunakan data ECOMMS serta mengambil kira gangguan disebabkan oleh kerja-kerja penambahbaikan sistem dan tidak termasuk gangguan besar atau dengan izin *major incidents*. Dengan penggunaan sistem ECOMMS, sasaran SAIDI bagi tahun 2021 ditetapkan pada 350 minit/tahun.

3. Kerajaan sedar bahawa kadar SAIDI di negeri Sabah adalah lebih tinggi berbanding dengan kadar SAIDI di Semenanjung. Sebahagian besar daripada gangguan bekalan elektrik ini berpunca daripada masalah di peringkat sistem pengagihan atau *distribution system* dengan izin, iaitu 97.7%, diikuti penjanaan (1.5%) dan penghantaran (0.8%). Antara faktor yang menyumbang kepada gangguan bekalan elektrik di peringkat pengagihan adalah gangguan binatang liar, pokok-pokok yang mengganggu kabel, kerosakan kabel dan lebihan beban yang berpunca dari sambungan haram.

4. Bagi mengurangkan kadar SAIDI di Sabah, Kerajaan telah menubuhkan satu Pasukan Petugas Khas yang diterajui oleh Suruhanjaya Tenaga dan turut dianggotai oleh pegawai-pegawai Kementerian, Tenaga Nasional Berhad (TNB), Sabah Electricity Sdn. Bhd. (SESB), wakil industri dan pakar-pakar teknikal yang bertanggungjawab untuk merangka pelan tindakan ke arah penurunan SAIDI Sabah pada tahun 2025. Pasukan Petugas Khas ini juga akan melakukan pemantauan secara berkala terhadap prestasi penyelenggaraan atau *maintenance regime* dengan izin yang dilaksanakan oleh SESB bagi mengatasi masalah gangguan yang berlaku di peringkat pengagihan dan memastikan SESB mencapai petunjuk prestasi utama atau *Key Performance Index* (KPI) dengan izin yang telah ditetapkan oleh Kerajaan pada setiap tahun.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 9 NOVEMBER 2021 (SELASA)

SOALAN

Minta **MENTERI PENGAJIAN TINGGI** menyatakan penilaian risiko dan persediaan Kementerian membuka semula pusat pengajian tinggi awam dan swasta.

JAWAPAN

Tuan Yang di-Pertua,

Keputusan untuk membenarkan kemasukan pelajar secara fizikal ke kampus Institusi Pendidikan Tinggi (IPT) secara berperingkat bermula pada 15 Oktober 2021 dibuat setelah penilaian risiko dilaksanakan serta selepas mengambil kira pandangan pelbagai pihak.

Susulan itu, beberapa langkah mitigasi telah diambil oleh pihak Kementerian Pengajian Tinggi seperti yang berikut:

- (i) **Membangunkan Prosedur Operasi Standard, dengan izin, *Standard Operating Procedures (SOP)* Sektor Pendidikan Tinggi: Pengoperasian IPT.** SOP ini menjadi rujukan utama pihak IPT dalam memastikan kelancaran proses kemasukan pelajar dan pengoperasian IPT. SOP ini juga disediakan dengan mempertimbangkan pelbagai aspek risiko kesihatan dan keselamatan warga IPT secara menyeluruh;
- (ii) **Memperhebat usaha pemberian vaksin kepada warga IPT melalui Program VACC2CAMPUS.** Program ini bertujuan untuk membentuk komuniti kampus yang selamat. KPT mensasarkan 100 peratus warga IPT (yang terdiri daripada pelajar, staf akademik dan staf bukan akademik), yang berdaftar dalam MySejahtera dan boleh divaksin menerima vaksinasi lengkap. Alhamdulillah, sehingga 31 Oktober 2021, sebanyak 85 peratus atau 1,080,104 daripada 1,276,267 orang warga IPT telah menerima vaksinasi lengkap.
- (iii) **Membekalkan Ujian *Rapid Test Kit (RTK)* kepada pelajar IPT melalui Program RTK@CAMPUS.** Program ini bertujuan untuk memastikan keselamatan warga kampus terpelihara selain mencegah penularan wabak COVID-19. Pembekalan RTK ini melibatkan pelajar sedia ada, pelajar baharu dan juga bagi maksud intervensi kepada pelajar luar kampus yang berulang-alik serta pelajar yang menunjukkan gejala. Sebanyak 1.16 juta unit RTK dibekalkan melibatkan kos peruntukan sebanyak RM17.5 juta;

- (iv) **Membuat pemantauan pelaksanaan SOP yang menyeluruh dari semasa ke semasa.** Ini merangkumi SOP Pentadbiran IPT; Pergerakan Pelajar IPT Kembali ke Kampus; Pengajaran dan Pembelajaran (PdP); Pelaksanaan Aktiviti Penyelidikan Dalam Makmal dan Bengkel; Pengurusan Pelajar di Kediaman dan Fasiliti Kampus; serta Pengurusan Aktiviti Pelajar; dan
- (v) **Melaksanakan program pembudayaan kawalan sendiri dan disiplin pematuhan SOP dalam kalangan warga IPT melalui Jawatankuasa Tindakan Kecemasan di setiap IPT.** Dalam hubungan ini, semua pihak bertanggungjawab untuk memainkan peranan masing-masing agar sentiasa mematuhi SOP.

Pada masa ini, pembukaan semula IPT secara keseluruhan adalah tertakluk kepada penilaian risiko oleh Kementerian Kesihatan Malaysia dan Majlis Keselamatan Negara. Jadinya, KPT sentiasa bersedia untuk membuat penambahbaikan terhadap SOP sedia ada, selaras dengan keputusan untuk memastikan pengoperasian IPT yang selamat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SAIFUDDIN NASUTION BIN
ISMAIL [KULIM BANDAR BAHARU]**

TARIKH : 9 NOVEMBER 2021 (SELASA)

SOALAN

Datuk Seri Saifuddin Nasution bin Ismail [Kulim Bandar Baharu] minta **MENTERI PENGAJIAN TINGGI** menyatakan berapa banyak syarikat terbitan atau startup pengkormesialan intelektual property di seluruh universiti tempatan dan mohon disenaraikan.

JAWAPAN

Tuan Yang di-Pertua,

Untuk makluman, terdapat sebanyak 248 buah syarikat terbitan atau *startup* atau *spin off* yang baru dan aktif di Universiti Awam dari tahun 2016 hingga tahun 2020 di bawah Rancangan Malaysia ke-11.

Jumlah syarikat terbitan/ *startup* /*spin off* di Universiti Awam ini sejak tahun 2016 sehingga tahun 2020 adalah seperti berikut:

- (i) tahun **2016** terdapat sebanyak 27 buah syarikat terbitan;
- (ii) pada tahun **2017** sebanyak 20 buah buah syarikat terbitan;
- (iii) pada tahun **2018** sebanyak 17 buah syarikat terbitan;
- (iv) tahun **2019** menunjukkan peningkatan ketara dari tahun sebelumnya iaitu sebanyak 78 buah syarikat penerbitan; dan
- (v) pada tahun **2020**, terdapat sebanyak 106 buah syarikat terbitan atau *spin off*.